

# Yanj nihánj taj xna'anj che'é nij rasuun tihaan naca Jesucristó rihaan síi cu'naj Juan a

**1** Nihánj me nij rasuun tihaan naca Jesucristó rihaan nij síi 'yaj suun rihaan so', ndaa vaa cataj xna'anj ma'an Diose rihaan so', ne rasuun guun ra'yanj ya vaa güii me nij rasuun yo' ei. Ne Jesucristó ro', so' me síi ca'née se-mozó rihaan síi cu'naj Juan síi nuu 'yaj suun rihaan so', ne dan me se xcaj síi cu'naj Juan cuentá che'é nu' nij rasuun nihánj, qui'yaj Jesucristó ei. <sup>2</sup>Ne síi cu'naj Juan me síi ataj xna'anj nihánj rihaan nu' nij yuvií che'é nu' se-nana Diose ndaa vaa cataj xna'anj Jesucristó rihaan so', ne rasuun quene'en ma'an so' me nu' nij rasuun nihánj adonj. <sup>3</sup>Ne cavii sa' uxrá nij síi nayaá nana nihánj rihaan tuvi', ne tananj uún ne cavii sa' nij síi a'née sa' nana nihánj, sese ya 'yaj nij so' ndaa vaa taj nana no rihaan yanj nihánj chuguanj. 'Q se daj doj quisij ya güii ca'ná' nij rasuun yo' ei.

<sup>4-5</sup>Dan me se 'unj sij cu'naj Juan me síi 'yaj yanj nihánj, ca'nej 'unj rihaan cunu' chij ya x'ne' nij soj sij man estado Asia sij amán rá ni'yaj man Jesucristó a. Dan me

se me rá 'unj qui'yaj ndo'o Diose qui'yaj ndo'o Nimán Diose qui'yaj ndo'o se luj che'é nij soj, ne me rá 'unj gaa xej nimán soj, qui'yaj nij so' adonj. Ne Diose ro', me síi nicun' yaj, ne asij naá nicun' so', ne vaa güii ca'na' so' adonj. Ne Nimán Diose ro', vaa guee inanj, ne chij ya se nucuaj nicaj so', ne nicun' so' rihaan xrúun Diose chruun xlá rej rii ta'nga' Diose ei. Ne dan me se Jesucristó me síi nata' nana ya rihaan ní', ne so' me síi cunuu i'na' uún asino yaan rihaan cunudanj nij síi cavi' síi cunu i'na' uún vaa güii, ne uun chij so' rihaan cunudanj nij síi nicaj suun rey man rihaan chumii nihánj adonj.

Ne Jesucristó me síi 'ee rá man ní', ne aj tinanii so' man ní' rihaan cacun' tumé ní' gaa cavi' so' a. <sup>6</sup>Ne cune' so' man ní' guun ní' síi nicaj suun rey ne guun ní' xrej nuu rihaan Rej so' Diose a. Ne ve'é guun chij so' nu' cavii nu' ca'anj adonj. Veé danj gaa ya ei.

<sup>7</sup>Dan me se ca'ná' so' xráá ngaa, ne quene'en cunudanj nij yuvií man

so', ne ndaa nij síi qui'yaj sayuun man so' quene'en man so', ne go' cunudanj nij yuvii man rihaan chumii cuxru' nimán nij so', che'é rej quinano ndo'o rá nij so' che'é cacun' tumé nij so' adonj. Veé danj gaa ya ei.

<sup>8</sup>Ne Diose síi 'nij ra'a man ní' taj: —'Unj me se ase vaa letrá A ga letrá Z vaa 'unj a. Dan me se veé 'unj nicun' asij rque, ne veé 'unj canicun' nu' cavii nu' ca'anj adonj. Dan me se veé 'unj nicun' yaj, ne veé 'unj nicun' asij naá, ne vaa güii cuchi' yá 'unj rihaan soj a. Ne 'unj me síi guun nucuaj qui'yaj cunudanj a —taj Diose síi 'nij ra'a man ní' a.

**Nana nihánj taj xna'anj daj  
vaa Jesucristó gaa curuvi' so'  
rihaan síi cu'naj Juan a**

<sup>9</sup>'Unj sij cu'naj Juan ro', tinúu soj mé 'unj, ne síi ran' sayuun ga soj mé 'unj, ne síi nucuaj nimán rihaan sayuun mej ga soj, ne danj ran' ní' che'é se sij me rá guun chij Diose rihaan chumii nihánj me nu' ní' a. Dan me se yáán 'unj yo'óo naj tanuu na ya'anj yo'óo cu'naj Patmos, ne yo' me rej ca'néé nii manj che'é se sij nata' se-nana Diose mej ne sij taj xna'anj nana che'é Jesucristó mej a. <sup>10</sup>Ne 'o güii na'víj ní' rihaan síi 'nij ra'a man ní' me se quene'en nimanj rasuun, ne dan me se rej xcoj ro', nucuaj ndo'o ca'mii yo'o so' cunoj, ne daj se uun rá' gaa a'yánj nii chruun a'yánj ro', danj guun raj gaa cunoj se-nana so' adonj. <sup>11</sup>Ne cataj so':

—'Unj ro', me ya síi canicun' asij rque, ne veé 'unj canicun' nu' cavii nu' ca'anj adonj —taj so' a. Dan

me se cataj so'— Cachron so' nana che'é nu' nij rasuun quene'én so' rihaan yanj, ne ca'nej so' rihaan nij síi amán rá ni'yaj manj yanj chij chuman' á. Dan me se rihaan nij síi man Efeso do', rihaan nij síi man Esmirna do', rihaan nij síi man Pérgamo do', rihaan nij síi man Tiatira do', rihaan nij síi man Sardis do', rihaan nij síi man Filadelfia do', rihaan nij síi man Laodicea do', ca'nej so' yanj yo' á —taj so' cunoj a.

<sup>12</sup>Gaa ne canicaj 'unj ni'yaj 'unj man síi ca'mii nana dan rihanj, ne quene'enj chij aga' oró mii aga' taj aga' ya'an a. <sup>13</sup>Ne tanuu nij aga' taj aga' ya'an ro', quene'enj 'o síi nicaj yu'unj man yuvii, ne nuu so' yatzij xcaan, ne 'nij catuun so' merque caxra' anó ndaa rucuaa so' a. Ne merque aga' oró mii me yo' a. <sup>14</sup>Ne raá so' do', yuvé raá so' do', me se catzii ndo'o vaa yo' a. Dan me se ase vaa cachij xráá matzinj catzii do', ase vaa yu've' do', danj vaa raá so' a. Ne rlij rihaan so' ro', ase vaa ya'an vaa yo', chuguun yo' a. <sup>15</sup>Ne tacóo so' ro', ase vaa aga' bronce marge axrj ya'an nii man rque chrúun hornó vaa tacóo so' a. Ne daj se uun rá' unó' cayuj vaj chráá xij ro', danj guun raj cunoj nana ca'mii so' a. <sup>16</sup>Ne ra'a so' rej nuva' so' ro', coro' so' chij yati', ne neé espadá sihaa nu' niha rihaan curihanj tu'va so', ne ase vaa nucuaj ndo'o chuguun güii ro', danj vaa chuguun nu' so' ni'yaj 'unj man so' a.

<sup>17</sup>Dan me se gaa quene'én 'unj man so', ne naxrú' 'unj ca'anj quináa 'unj rihaan yo'óo tacóo so',

ne ase vaa síi cavi' ro', danj vaa 'unj a. Dan me se cuta' so' ra'a so' rej nuva' so' xráj, ne cataj so':

—Se cuchu'ví' so' ma'. 'Unj ro', me síi táa yaan rihaan cunudanj, ne veé 'unj me síi noco' xco rihaan cunudanj adonj. <sup>18</sup>Ne síi vaa i'na' mej a. Dan me se cavi' 'unj, tzaj ne cuano nihánj me se vaa i'na' uún 'unj, ne dan me se yo'o gaa i'na' 'unj nu' cavii nu' ca'anj adonj. Ne 'unj ro', me síi no xcuún cataj me síi cavi' ne me síi ca'anj rej man nij síi cavi' adonj.

<sup>19</sup>”Che'é dan me cachron so' nana rihaan yanj che'é nu' se vaa quene'én so' nihánj, ne dan me se cachron so' che'é rasuun man cuano, ne cachron so' che'é rasuun ca'na' rej rihaan ní' a. <sup>20</sup>Ne nihánj me se cataj xna'anj 'unj che'é chij nij yati' taj ra'aj ne'én so' do', che'é chij nij aga' oró míi aga' taj aga' ya'an do' a. Dan me se chij nij yati' do', nij aga' taj aga' ya'an do', ma'an nij yuvii amán rá ni'yaj manj yanj chij nij aman' me nij rasuun yo' a —taj so' rihanj a.

**Nana nihánj me nana ca'anj  
rihaan nij síi amán rá ni'yaj man  
Jesucristó ne chuman' Efeso a**

**2** Gaa ne cataj so' rihanj a:  
—Nana nihánj me nana cachron so' ca'nej so' rihaan nij síi amán rá ni'yaj manj ne chuman' Efeso á: “Dan me se nihánj me nana ca'mii 'unj sij nicaj chij yati' ra'a rej nuva' ei. Ne sij vaj sca'núj chij nij aga' oró míi taj aga' ya'an mej ei. Dan me se cunō soj sij ne chuman' Efeso a. <sup>2</sup>Aj ne'én 'unj daj 'yaj soj se vaa 'yaj suun uxrá soj ne

nucuaj ndo'o vaa nimán soj rihaan sayuun adonj. Ne aj ne'enj se vaa na'vej uxrá rá soj ni'yaj soj man nij síi chí'ij mei. Ne xa' nij síi tiha' yu'unj tu'va rma'an se vaa sij cune' Jesucristó nata' rihaan yuvii che'é so' me nij so', tzaj ne aj nuchruj raa soj che'é nij so', ne aj xcax soj cuentá se vaa nuveé sij a'mii ya me nij so' a man adonj. <sup>3</sup>Ne nucuaj ndo'o vaa nimán soj rihaan sayuun quiran' soj che'é rej sij noco' manj me soj, ne ne ca'ne' a doj rá soj a ma'. <sup>4</sup>Tzaj ne vaa 'o cacun' tumé soj rihanj se vaa asij rque doj me se caráj cochroj ndo'o soj rihanj, tzaj ne yaj me se do' do' ca'ne' rá soj aráj cochroj soj rihanj ei.

<sup>5</sup>”Che'é dan nanuj rá soj daj qui'yaj soj gaa ataa ca'anj yanj soj rihanj, ne canicaj nimán soj, ne guun rá soj ndaa vaa guun rá soj asino yaan á. Sese se canicaj nimán soj, ne cuchi' 'unj rihaan soj, ne ca'nee 'unj se-aga' soj aga' taj aga' ya'an rej nicun' yo' nanj adonj. <sup>6</sup>Tzaj ne nihánj me se sa' qui'yaj soj, se vaa na'vej uxrá rá soj ni'yaj soj se vaa 'yaj nij síi nicolaíta, ne veé danj vaa guee, ne na'vej rá ma'anj ni'yaj 'unj se vaa 'yaj nij so' uún ma'. <sup>7</sup>Dan me se sese taj yu'uj xréé soj, ne no xcuún soj cunō soj nana nihánj nana taj xna'anj Nimán Diose rihaan nij síi amán rá ni'yaj manj ne 'o 'o chuman' a. Dan me se rihaan síi 'yaj canaán rihaan nu' sayuun me se rque 'unj chruj man raa chruun qui'yaj gaa i'na' yuvii nu' cavii nu' ca'anj ga Diose cha so', ne chruun yo' ro', nicun' rej sa' ndo'o rej rihaan ma'an Diose ei.”  
Veé danj síj nana cachron so' ca'nej

so' rihaan nij sí amán rá ni'yaj  
manj ne chuman' Efeso a —taj so'  
rihanj a.

**Nana nihánj me nana ca'anj**  
**rihaan nij sí amán rá ni'yaj man**  
**Jesucristó ne chuman' Esmirna a**

<sup>8</sup>Gaa ne cataj uún so' rihanj a:  
—Nana nihánj me nana cachron  
so' ca'nej so' rihaan nij sí amán rá  
ni'yaj manj ne chuman' Esmirna  
a: “Dan me se nihánj me nana  
ca'mii 'unj sij nicun' asij rque do',  
sij canicun' nu' cavii nu' ca'anj do',  
ne sij cavi' mej, tzaj ne cunuu i'na'  
ya uún 'unj ei. <sup>9</sup>Ne'én 'unj daj vaa  
sayuun ran' nij soj sij man chuman'  
Esmirna, ne ne'én 'unj se vaa nique  
ndo'o soj adonj. Tzaj ne rihaan  
Diose me se sí ru'vee me ya soj ei.  
Ne vaa nij sí tu'va rma'an taj se  
vaa yuvi israelitá me nij so', tzaj ne  
nuveé sij israelitá me ya nij so' ma'.  
Maan sij tucu'yón se-nana Satanás  
me nij so' nanj á. Ne ne'én 'unj  
se vaa a'mii nij so' nana nij che'é  
soj ei.

<sup>10</sup>”Tzaj ne a doj se kuchu'vi' soj  
che'é sayuun quiran' soj ma'. Dan  
me se sí chree ro', me se caxrii  
so' taga' man ta'aj soj, che'é rej  
chuchu'vi' soj ne tanáj soj tucuáan  
sa' ei. Ne chi' güii quiran' soj  
sayuun danj chuguanj. Dan me se  
nda' se ticavi' nii man soj, tzaj ne  
yo'o canoco' soj manj, ne vaa güii  
rque 'unj 'o cachriin cunuû raá soj,  
che'é rej sij gaa i'na' nu' cavii nu'  
ca'anj ga Diose guun soj ei. <sup>11</sup>Dan  
me se sese taj yu'uj xréé soj, ne no  
xcúún soj cunō soj nana nihánj nana  
taj xna'anj Nimán Diose rihaan  
nij sí amán rá ni'yaj manj ne 'o 'o

chuman' a. Dan me se se quiran' sí  
qui'yaj canaán yo' sayuun asa' cavi'  
uún nij sí tumé cacun' a ma'.” Veé  
danj síj nana cachron so' ca'nej so'  
rihaan nij sí amán rá ni'yaj manj  
ne chuman' Esmirna a —taj uún so'  
rihanj a.

**Nana nihánj me nana ca'anj**  
**rihaan nij sí amán rá ni'yaj man**  
**Jesucristó ne chuman' Pérgamo a**

<sup>12</sup>Gaa ne cataj uún so' rihanj a:  
—Nana nihánj me nana cachron  
so' ca'nej so' rihaan nij sí amán rá  
ni'yaj manj ne chuman' Pérgamo  
a: “Dan me se nihánj me nana  
ca'mii 'unj sij nicaj neê espadá  
sihaa nu' niha rihaan rihaan soj  
sij ne chuman' Pérgamo a. <sup>13</sup>Ne'én  
'unj rej ne nij soj, se vaa uun chij  
ndo'o Satanás rej yo' ei. Tzaj ne  
yo'o noco' soj manj, ne ne tanáj xco  
soj se-tucuanj 'unj ma'. Dan me se  
vaa sí cu'naj Antipas sí yo'o nata'  
rihaan yuvi che'é 'unj, ne nda' se  
ticavi' nii man so' rej ne soj rej  
ne ma'an Satanás, tzaj ne ne ca'ne'  
rá soj ga se-nanaj ma'. <sup>14</sup>Tzaj ne  
vaa doj cacun' tumé soj rihanj,  
se vaa maan sca'núj soj 'nij sí  
noco' se-nana sí cu'naj Balaam sí  
tucu'yón rihaan sí cu'naj Balac se  
vaa ca'nej so' tucuáan chi'ii nimán  
nij sí israelitá se vaa cha' nij sí  
israelitá rasuun rque nii rihaan nij  
ya'anj cacó' nij tuvi' Balac ne qui'yaj  
nij so' cacun' ga chana, ne dan  
me se quiri' nij sí israelitá rihaan  
Diose, qui'yaj cacun' yo' ei. <sup>15</sup>Ne  
tananj uún, ne man ta'aj nij sí nicaj  
se-tucuanj nij sí nicolaíta sca'núj  
soj uún ei. Dan me se nachrí' 'unj  
ni'yaj 'unj tucuáan yo' ei.

16”Che'é dan canicaj nimán soj, tanáj soj chrej chi'ii yo' ei. Se taj, ne ra'yanj cuchì 'un̄j rihaan soj, ne nìcay 'un̄j neè espadá nuu tu'vaj cunu' 'un̄j ga nij soj adonj. 17 Sese taj yu'uj xrée soj, ne no xcúun soj cun̄o soj nana nihánj nana taj xna'anj Nimán Dios̄e rihaan nij síí amán rá ni'yaj manj ne 'o 'o chuman' a. Rihaan síí 'yaj canaán ro', rque 'un̄j se cu'naj maná se 'nij yuve chá so', ne caxrii 'un̄j 'o yahij catzii ston so', ne quino naca 'o se-chuvii yo'o so' nìcay síí qui'yaj canaán, ne dan me se taj a 'ó síí ca'vee nayaá nana yo' a ma'. Maan se orún' síí nìcay yahij catzii yo' me síí quene'en me taj yo' nanj adonj.” Veé danj síj nana cachron so' ca'nej so' rihaan nij síí amán rá ni'yaj manj ne chuman' Pérgamo a —taj so' rihanj a.

**Nana nihánj me nana ca'anj  
rihaan nij síí amán rá ni'yaj man  
Jesucristó ne chuman' Tiatira a**

18 Gaa ne cataj uún so' rihanj a:  
—Gaa ne cachron so' nana nihánj  
ne ca'nej so' rihaan nij síí amán  
rá ni'yaj manj ne chuman' Tiatira  
a: “Dan me se nana nihánj me  
nana ca'mii 'un̄j ta'nij Dios̄e cun̄o  
soj, ne 'un̄j ro', ase vaa ya'an vaa  
riij rihanj, ne ase vaa aga' bronce  
maree vaa tacó a. 19 Ne'éen 'un̄j daj  
'yaj nij soj se vaa 'ee rá soj tinúú soj  
ne yo'o amán rá soj ni'yaj soj manj  
ne 'yaj suun soj che'é tinúú soj ne  
yo'o nucuaj vaa nimán soj rihaan  
sayuun a. Dan me se doj a 'yaj  
suun soj yaj adonj. Gaa guun che'e  
soj canoco' soj manj me se doj doj  
'yaj suun soj nda' rá se 'yaj soj yaj ei.

20 Tzaj ne vaa cacun' tumé soj rihanj  
se vaa a'vej rá soj cayáan chana  
cu'naj Jezabel ga soj a. Ne no' me  
nii taj se vaa chana nata' se-nana  
Dios̄e me no', ne tucuyón no' man  
yuvii, ne tiha' yu'unj no' man nij  
síí 'yaj suun rihaan ma'anj ei. Ndaa  
síj, gaa ne 'yaj nij so' cacun' ga  
chana ne chá nij so' rasuun rque nii  
rihaan ya'anj cacóo nii uún adonj.  
21 Ne ca'ne' raj cachon doj güii  
che'é rej guun raj se vaa canicaj  
nimán no' ne tanáj no' chrej chi'ii ne  
canoco' no' chrej sa' adonj. Tzaj ne  
na'vej rá no' canicaj rá no' ne tanáj  
no' se chi'ii 'yaj no' ma'. 22 Che'é  
dan nihánj me se quirii'ij 'un̄j man  
no' rihaan chruun camá, ne nij síí  
qui'yaj cacun' ga no' ro', quiran'  
uxrá nij so' sayuun, qui'yáj adonj.  
Danj quiran' nij so' sese se canicaj  
nimán nij so' ne se tanáj xco nij so'  
se vaa 'yaj nij so' ga no' ei. 23 Ne yo'o  
cavi' ta'níí chana yo', qui'yáj, gaa  
ne quene'en cunudanj nij síí amán  
rá ni'yaj manj ne 'o 'o chuman' se  
vaa 'un̄j me síí acay ndo'o cuenta  
daj vaa raá yuvií do', daj vaa nimán  
yuvií do', ne naru'vee 'un̄j rihaan  
'o 'o nij soj che'é se vaa 'yaj 'o 'o nij  
soj chuguanj.

24”Ne nihánj me se ca'mii 'un̄j  
rihaan yo'ó nij soj sij man chuman'  
Tiatira sij ne noco' tucuáan chi'ii  
yo' a. 'O se tucuáan sca' yuve  
ndo'o me tucuáan noco' yo'ó nij so',  
rá ma'an nij so', tzaj ne se-tucuanj  
Satanás me yo' rihaan soj, ne ne  
nari' soj tucuáan yo' a ma'. Dan  
me se taj che'é cuta' 'un̄j doj suun  
xráa soj a ma'. 25 Maan se yo'o  
noco' soj tucuáan nìcay soj ndaa  
se quisij güii cuchì 'un̄j rihaan

soj ei. <sup>26</sup>Ne sí 'yaj canaán yo'lo 'yaj suun suun ca'ne' 'un̄j rihaan ndaa se cuchí 'un̄j rihaan soj ro', guun chij so' rihaan nij chuman' na'vej rá canoco' manj, qui'yáj adonj. <sup>27</sup>Ne nicaj so' vará aga' hierró, ne tumé so' man nij so', ne dan me se ndaa rá se vaa 'yaj nii gaa uxra' nii xruj ro', danj gaa qui'yaj sí guun chij yo' chuguanj. <sup>28</sup>Dan me se ase vaa guun chij ma'anj qui'yaj Réj Diose ro', danj gaa guun chij so', ne rque 'un̄j yati' xta'ngaa urihanj rej nichrun' rá ranga' rihaan so' adonj. <sup>29</sup>Sese taj yu'uj xréé soj, ne no xcúún soj cunó soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a.” Veé danj síj nana cachron so' ca'nej so' rihaan nij sí amán rá ni'yaj manj ne chuman' Tiatira a —taj so' rihanj a.

**Nana nihánj me nana ca'anj  
rihaan nij sí amán rá ni'yaj man  
Jesucristó ne chuman' Sardis a**

**3** Gaa ne cataj uún so' rihanj a:  
—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Sardis a: “Dan me se nihánj me nana ca'mii 'un̄j sij nicaj Nimán Diose do', chij nij yati' do', rihaan soj sij man chuman' Sardis, ne Nimán Diose ro', vaa guee so', ne chij ya se nucuaj nicaj so' a. Ne'én 'un̄j daj 'yaj nij soj, ne dan me se sí vaa i'na' ya nimán me soj, rá yuvii, tzaj ne ase vaa sí cavi' nimán vaa soj rihanj nanj adonj. <sup>2</sup>Dan me se narii soj nej rihaan soj ruguanj. Tumé soj man ma'an soj, ne ca'nej soj se nucuaj nimán tinúú soj nij sí daj doj cavi'

nimán á. 'O se xcaj 'un̄j cuentá se vaa nu' se 'yaj soj, nuveé se aran' rá Diose me nij yo' ma'. Tadó soj ei.

<sup>3</sup>”Che'é dan nanuj rá soj nana tucu'yón nii man soj do', nana cuno soj do', ne yo'lo qui'yaj soj ndaa vaa taj nana yo', ne canicaj nimán soj canoco' soj chrej sa' ei. Sese se tumé soj man soj, ne ase vaa 'na' sí ituu ro', danj gaa cuchij rihaan nij soj, ne se quene'en uxrá soj me orá me cuchij rihaan soj man adonj. <sup>4</sup>Tzaj ne man ta'aj tuvi' soj sij man chuman' Sardis ne qui'yaj cacun' mei. Ne che'é dan ase vaa sí nuu yatzíj naruvii ro', danj vaa nij so' cuano rihanj chuguanj. Ne nij so' ro', vaa güii cunuú nij so' yatzíj catzii, ne cachee nij so' gaj adonj. 'O se no xcúún nij so' qui'yaj nij so' danj adonj. <sup>5</sup>Dan me se cunudanj nij sí 'yaj canaán ro', vaa güii rque nii yatzíj catzii cunuú so', ne daj chihaa mij se tirí 'un̄j se-chuvii so' no rihaan yanj no se-chuvii nij sí gaa i'na' ga Diose nu' cavii nu' ca'anj ma'. Ne nata' 'un̄j rihaan Réj Diose, rihaan nij se-mozó so' do', se vaa me nij so' sí noco' manj adonj. <sup>6</sup>Sese taj yu'uj xréé soj, ne no xcúún soj cunó soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a.” Veé danj síj nana cachron so' ca'nej so' rihaan nij sí amán rá ni'yaj manj ne chuman' Sardis a —taj so' rihanj a.

**Nana nihánj me nana ca'anj  
rihaan nij sí amán rá ni'yaj man  
Jesucristó ne chuman' Filadelfia a**

<sup>7</sup>Gaa ne cataj uún so' rihanj a:  
—Nana nihánj me nana cachron so' ca'nej so' rihaan nij sí amán rá

ni'yaj manj ne chuman' Filadelfia a: "Dan me se nihánj me nana ca'mii 'unj sij vaa sa' inanj sij ca'neé ya Diose rihaan chumii cunō soj a. Ne 'unj ro', me sí uun chij ndo'o ndaa vaa guun chij sí cu'naj David gaa naá adonj. Dan me se sese ca'núj 'unj ta'yaa, ne taj sí quisij naráán ta'yaa yo' ma'. Ne sese caráán 'unj ta'yaa, ne taj sí quisij ca'nuu uún ta'yaa yo' ma'. <sup>8</sup>Dan me se aj ne'én 'unj daj 'yaj nij soj a. Ne nihánj me se xcaj soj cuentá se vaa aj ca'núj 'unj ta'yaa rej rihaan soj, ne taj sí quisij naráán ta'yaa yo' ma'. Ne nij soj me se nda' se nuveé sij nucuaj ndo'o nimán me soj, tzaj ne yo'o 'yaj soj se-nanaj, ne ne cataj soj se vaa nuveé sij noco' manj me soj ma'. Yo'o taj soj se vaa sij noco' manj me soj adonj. <sup>9</sup>Ne vaa nij sí tu'va rma'an se vaa sij israelitá me nij so', tzaj ne nuveé sij israelitá ya me nij so' ma'. Maan se sí ne me nij so', ne sí tucu'yón se-nana Satanás me uún nij so' ei. Dan me se nagoj man nij so' rihaan soj, ne cuchí' nij so' rihaan soj, ne canicun' ruj nij so' rihaan soj, ne quene'en nij so' se vaa sij cunuu 'ee raj man me soj adonj. <sup>10</sup>Che'é se aj qui'yaj soj nu' se-nanaj nana taj se vaa nō xcúún soj gaa nucuaj nimán soj rihaan sayuun ro', che'é dan tinanii 'unj man soj rihaan sayuun ca'na' rihaan nu' chumii nihánj vaa güii, asa' xcaj 'unj cuentá daj vaa nimán cunudanj nij yuvii man rihaan chumii adonj.

<sup>11</sup>”Dan me se daj doj cuchij rihaan soj chuguanj. Nicaj raan soj tucuaán nicaj soj, gaa ne se ca'vee ca'nee nii cachriin cunuú

raa soj cachriin qui'yaj canaán soj rihaan soj ei. <sup>12</sup>Ne sí qui'yaj canaán ro', me se ase vaa 'o chraan xcaan nicun' tacóo nuvíi nocoō rej na'víj yuvii rihaan Diose ro', danj gaa so' rihanj, qui'yáj, ne se curihanj uún so' rej né 'unj ma'. Ne rihaan so' ro', cachron 'unj va'nuj nana, ne dan me se cachron 'unj se-chuvii Diose síi noco' 'unj, ne cachron 'unj se-chuvii chuman' ne Diose noco' 'unj chuman' cu'naj chuman' Jerusalén chuman' naca nanij rihaan chumii nihánj, ne cachron 'unj se-chuvii ma'anj nana naca ya cachron 'unj rihaan so' adonj. <sup>13</sup>Sese taj yu'uj xréé soj, ne nō xcúún soj cunō soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a.” Veé danj sīj nana cachron so' ca'nej so' rihaan nij sí amán rá ni'yaj manj ne chuman' Filadelfia a —taj so' rihanj a.

**Nana nihánj me nana ca'anj rihaan nij sí amán rá ni'yaj man Jesucristó ne chuman' Laodicea a**

<sup>14</sup>Gaa ne cataj uún so' rihanj:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Laodicea a: “Dan me se nana nihánj me nana ca'mii 'unj sij qui'yaj nu' nana cataj xna'anj 'unj rihaan soj a. Dan me se 'unj me síi nata' ya se-nana Diose rihaan soj ndaa vaa me rá Diose qui'yáj, ne 'unj me síi qui'yaj nu' se man rihaan chumii nihánj ei. Ne qui'yáj nu' se vaa me rá Diose qui'yáj ei. <sup>15</sup>Dan me se ne'enj nu' se vaa 'yaj soj, ne nuveé se acoj ne nuveé se ya'aan me soj mei. Ca'vee



doj a sese guun soj se acoj inanj ni', ase se ya'aan inanj ni' a. <sup>16</sup>Dan me se che'é se ase vaa na guun vaa soj ne nuveé se acoj nuveé se ya'aan nuveé me soj, ne che'é dan ne se uun soj rihanj ma'. Dan me se maan che'é se danj vaa soj ro', che'é dan ticamanj man soj rihaan yo'óo nanj adonj. <sup>17</sup>Dan me se taj soj se vaa ru'vee inanj soj, ne taj vaj a doj rasuun ne achiin rihaan soj, rá soj a. Tzaj ne ne ne'en soj sese ase vaa síi nique ndo'o vaa soj, ne ase vaa síi achiin caridad rihaan vaa soj, ne ase vaa tuchrii vaa soj, ne ase vaa síi canj nuvi' sagan' ro', vaa nu' soj nanj adonj.

<sup>18</sup>”Che'é dan narquej rej nucuj man soj se vaa quiraan soj aga' oró míi rihanj aga' cachén ya'an ne cunu sa' inanj, gaa ne ca'vee cunu ru'vee ya ya soj rihanj ei. Ne quiraan soj yatzij catzii rihanj, ne ca'vee cunuú soj, ne se quene'en yuvi se vaa nuvi' sagan' soj ne se guun na'aj soj se vaa nuvi' sagan' soj ma'. Ne quiraan soj rmedió sa' rihanj, ne caxrii soj rlii rihaan soj, gaa ne ca'vee quene'en soj, ne xcaj sa' soj cuentá ei. <sup>19</sup>Dan me se 'unj ro', taj xna'anj 'unj rihaan nu' nij síi 'ee raj man daj qui'yaj nij so', ne qui'yáj sayuun man nij so' sese se cuno nij so' rihanj chuguanj. Che'é dan guun nihá' rá soj cuno soj rihanj, ne canicaj nimán soj canoco' soj chrej sa' doj á. <sup>20</sup>Nihánj me se ase vaa 'o síi nicun' ta'yaa ne tica'mii ta'yaa ro', vaa 'unj a. Ne sese vaa yo'o so' cuno se-nanaj, ne sese ca'nuu so' ta'yaa, ne catuu 'unj rihaan so', ne chaj chraa ga so', ne so' cha chraa ga 'unj, ne ve'é qui'yaj

núj ei. <sup>21</sup>Ne síi qui'yaj canaán ro', cayáan so' rihaan xrúun 'unj chruun xlá sa' ga 'unj, ne guun chij so' gaj, qui'yáj, ndaa vaa qui'yaj Réj Diose gaj ei. Dan me se gaa qui'yaj canaán ma'anj, ne cayáan 'unj rihaan xrúun Réj Diose chruun xlá sa' ga so', ne guun chij 'unj ga so', qui'yaj so' chuguanj. <sup>22</sup>Sese taj yu'uj xrée soj, ne no xcúun soj cuno soj nana nihánj nana taj xna'anj Nimán Diose rihaan nij síi amán rá ni'yaj manj ne 'o 'o nij chuman' adonj.” Veé danj síj nana cachron so' ca'nej so' rihaan nij síi amán rá ni'yaj manj ne chuman' Laodicea a —taj so' rihanj a.

**Nana nihánj taj xna'anj se vaa quene'en Juan ma'an chruun xlá sa' rej uun chij Diose a**

**4** Quisíj ca'mii so' nu' nana dan, gaa ne quene'én 'unj 'o ta'yaa taj ya'núj rej xtá' a. Gaa ne cuno 'unj ca'mii uún síi ca'mii asino yaan rihanj, ne se-nana so' ro', daj se uun rá' unó' a'yánj nii chruun a'yánj ro', danj guun raj gaa cunoj se-nana so' a. Ne cataj so' rihanj a:

—Cavií so' ca'na' so' nihánj, gaa ne tihanj rihaan so' nu' se vaa guun rej rihaan so' á —taj so' rihanj a.

<sup>2</sup>Ne ra'yánj quene'en nimanj rasuun, ne quene'enj chruun xlá sa' ndo'o rej xtá', ne vaa síi taj chruun xlá yo' síi uun chij ndo'o, <sup>3</sup>ne ase vaa yahij jaspe do', ase vaa yahij cornalina do', danj vaa so' curuvi' so' a. Ne ase vaa xcuáá cu'lúu ro', danj vaa nu' anicaj chruun xlá sa' yo', ve'é chuguun yo', ne ase vaa chuguun yahij esmeralda ro', danj vaa chuguun yo' a. <sup>4</sup>Ne nu' anicaj



chruun xlá sa' yo' ro', nicun' yo'ó ico ca'anj chruun xlá sa', ne taj ico ca'anj síi uun chij rihaan nij chruun xlá sa' yo', ne nuu nij síi uun chij yatzíj catzii, ne nuu raa nij so' cachriin aga' oró míi a. <sup>5</sup>Ne rej nicun' chruun xlá nicun' tanuu tuvi' me se raan ndo'o, ne cariin ndo'o, ne caguáj ndo'o tu'vii a. Ne chij aga' chuguun táa ya'an ro', nicun' rihaan chruun xlá sa', ne chij aga' chuguun yo' ro', me Nimán Diose síi guee inanj síi nicaj chij ya se nucuaj a. <sup>6</sup>Ne rej rihaan chruun xlá sa' yo' ro', nuu 'o na ya'anj, tzaj ne nuveé na ya me yo' ma'. Maan scuraan inanj me yo', ne ase vaa yahij cristal danj vaa yo' a.

Ne nu' anicaj chruun xlá sa' yo' ne tanuu yo'ó nij chruun xlá me se nicun' ca'anj xcuu, ne nu' anicaj man nij xcuu mán rlij rihaan nij xo' a. <sup>7</sup>Ne yo'ó xcuu ro', ase vaa chuvaá vaa xo' a. Ne xcuu vij ro', ase vaa scúj lelej vaa xo' a. Ne xcuu va'núj ro', ase vaa rihaan snó'o vaa rihaan xo' a. Ne xcuu ca'anj ro', ase vaa xtaa vaj rej xtá' vaa xo' a. <sup>8</sup>Ne vaa vatán' scachee 'o 'o nij xo' taj xráa nij xo', ne ase vaa scachee xtáj vaa scachee nij xo' yo' a. Ne nu' xráa xo' nu' rque xo' nu' mán rlij rihaan xo' adonj. Ne nuvii nigan' me se ne a'ne' rá nij xo' ga suun taj: “Sij guee ndo'o me Diose síi 'nij ra'a man ní' síi uun nucuaj 'yaj cunudanj a. Ne so' me síi nicun' yaj, ne asij naá nicun' so', ne vaa güii cuchí' so' rihaan chumii a”, taj ca'anj nij xcuu yo' a. <sup>9</sup>Ne gaa ca'mii sa' nij xcuu che'é Diose síi taj rihaan chruun xlá sa' yo' síi cayáán nu' cavii nu' ca'anj, ne gaa nago' nij

xo' graciá rihaan so', <sup>10</sup>ne canicun' ruj ico ca'anj nij síi uun chij yo' rihaan síi taj rihaan chruun xlá sa' yo', ne quina'víj nij so' rihaan so', che'é rej me so' síi cayáán nu' cavii nu' ca'anj, ne tagüéj nij so' cachriin nuu raa nij so' rej rihaan chruun xlá sa' yo' a. Gaa ne cataj nij so':

<sup>11</sup>—No xcúún ndo'o so' Diose sij 'nij ra'a man núj ca'mii sa' núj che'é so' ne guun chij ndo'o so' á. 'O se so' me síi qui'yaj cunudanj rasuun, ne maan che'é se guun rá so' cumán nij rasuun yo' ro', che'é dan guun cunudanj nij rasuun, qui'yáa so' adonj —taj ico ca'anj nij síi uun chij yo' rihaan Diose a.

**Nana nihánj taj xna'anj che'é  
yanj do', che'é matzinj le'ej  
no xcúún nuxra' yanj do' a**

**5** Ne rej nuva' síi taj rihaan chruun xlá sa' yo' ro', quene'enj 'o yanj, ne no nana nu' rej rque yanj nu' rej xraj yanj nu' a. Ne no chij selló yánj tu'va yanj yo', ne aráán selló yo' nu' anicaj tu'va yanj yo' a. <sup>2</sup>Gaa ne quene'én 'unj yo'ó se-mqzó Diose síi nucuaj ndo'o, ne nucuaj ndo'o xná'anj so', cataj so', ne:

—Me síi no xcúún ca'nee nij selló no aráán tu'va yanj ne nuxra' so' yanj ga —taj so', xná'anj so' a.

<sup>3</sup>Ne taj vaj a 'ó síi ne rej xtá' do', síi ne rihaan chumii do', síi ne rej rque chumii do', guun nucuaj nuxra' yanj ne ni'yaj so' yanj yo' a ma'.

<sup>4</sup>Che'é dan ta'vee uxraj che'é se ne nari' nii man a 'ó síi ni'yaj nimán nuxra' yanj yo' ni'yaj man yanj yo' a man adonj. <sup>5</sup>Gaa ne yo'ó tuvi' nij síi uun chij cataj rihanj a:

—Se ta'veé so' ma'. Xcaj so' cuentá, ne aj qui'yaj canaán síi chuvaa ta'níi ta'nij si'no síi cu'naj Judá síi cayáán gaa naá, ne yo'o ta'níi ta'nij si'no David me uún so', ne che'é dan ca'vee ca'nee so' chij nij selló no tu'va yanj ne nuxra' so' yanj yo' nanj adonj —taj so' rihanj a.

<sup>6</sup>Gaa ne quene'én 'unj se vaa tanuu nij chruun xlá sa' do', tanuu ca'anj nij xcuu do', tanuu nij síi uun chij do', nicun' 'o matzinj le'ej, ne matzinj aj ticavi' nii man asij rque me yo' a. Ne chij cúu taj raa xo', ne chij nij rlij rihaan xo', ne nij rlij rihaan xo' ro', nij yo' me Nimán Diose síi guee inanj síi nicaj chij ya se nucuaj síi aj ca'née Diose rihaan nu' chumií a. <sup>7</sup>Dan me se cuchi' xo' rihaan síi taj rihaan chruun xlá sa' yo', ne quita'aa xo' yanj oro' ra'a síi taj rihaan chruun xlá rej nuva' so' a. <sup>8</sup>Ne gaa quita'aa xo' yanj, ne canicun' ruj ca'anj nij xcuu do', ico ca'anj nij síi uun chij do', rihaan matzinj le'ej yo' a. Ne nicaj 'o 'o nij so' ya'ánj sa' do', co'oo aga' oró míi caraa squíi xlá rque do', ne squíi xlá yo' ro', me nij nana achíin ni'yaj nij síi sa' noco' man Diose rihaan ma'an Diose a. <sup>9</sup>Gaa ne achráá nij so' chra' naca rihaan matzinj le'ej, cataj nij so', ne:

—No xcúún so' nicaj so' yanj ne ca'nee so' selló yánj aráán no tu'va yanj yo' á. 'O se ticavi' nii mán so', ne dan me se nicaj so' ton mán so' quiránj so' man 'o 'o nij yuvií man rihaan chumií nihánj, ne dan me se quiránj so' man nij yuvií a'mii nu' yo'ó xna'ánj, ne quiránj so' man nij yuvií man daj a chuman' man

daj a yo'óo noco do', quiránj so' che'é Diose á. <sup>10</sup>Gaa ne guun chij Diose rihaan nij so', qui'yáá so', ne guun nij so' xrej nuu rihaan Diose, qui'yáá so', ne vaa güii guun chij nij so' rihaan chumií adonj —taj chra' achráá nij so' a.

<sup>11</sup>Gaa ne quene'en uún 'unj, ne cunó 'unj se-nana que'ee míj míj se-mozó Diose nicun' nu' anicaj chruun xlá sa' do', nij xcuu do', nij síi uun chij do' a. <sup>12</sup>Ne nucuaj ndo'o ca'mii nij se-mozó Diose yo', cataj nij so' a:

—No xcúún ndo'o matzinj le'ej ticavi' nii man guun nucuaj ndo'o so' do', nicaj so' nu' rasuun sa' do', cavii ndo'o raa so' do', ca'mii sa' taran' níi che'é so' do', guun chij ndo'o so' do' adonj —taj nij se-mozó Diose ni'yaj nij so' matzinj le'ej yo' a.

<sup>13</sup>Gaa ne cunó 'unj se vaa ca'mii cunudanj nij rasuun qui'yaj Diose rasuun man rej xta' do', rasuun man rihaan chumií do', rasuun man rque chumií do', rasuun man rihaan na ya'anj do', rasuun man rque na ya'anj do' a. Ne cataj nij rasuun: —Rihaan síi taj rihaan chruun xlá sa' do', rihaan matzinj le'ej do', ca'mii sa' taran' níi nu' cavii nu' ca'anj, ne guun chij roj so' nu' cavii nu' ca'anj ei —taj cunudanj nij rasuun a.

<sup>14</sup>Gaa ne:

—Veé danj gaa ya ei —taj ca'anj nij xcuu yo' a.

Gaa ne canicun' ruj nij síi uun chij, ne na'víj nij so' rihaan Diose a.

**Nana nihánj taj xna'anj se vaa ca'néj matzinj le'ej chij nij selló yánj caráán tu'va yanj yo' a**

**6** Gaa ne quene'én 'unj se vaa ca'néj matzinj le'ej yo' yo'

tuvi' nij chij selló caráán tu'va yanj libró yo', gaa ne cunoj ca'mii yo' o tuvi' ca'anj nij xcuu, ne ase uun rá' gaa aguáj tu'vii ro', danj guun raj gaa ca'mii xo' a. Ne:

—Cuvá' so' ni'yaj so' ei —taj xcuu yo' a.

<sup>2</sup>Gaa ne quene'én 'unj se vaa cavii 'o cuayó catzi, ne síí taj xráá cuayó yo' ro', nicaj so' curuvej, ne rqué nii cachriin cunuû raá so' man so', ne sij 'yaj canaán ndo'o me so', ne cavii so' qui'yaj canaán so' a.

<sup>3</sup>Ne gaa ca'néj matzinj le'ej selló vij no tu'va yanj yo', ne cunó 'unj ca'mii xcuu vij a. Ne xcuu vij cataj:

—Cuvá' so' ni'yaj so' ei —taj xo' a.

<sup>4</sup>Gaa ne cavii yo'ó cuayó, ne cuayó maree me xo' a. Gaa ne ca'ne' nii suun rihaan síí taj xráá cuayó yo' se vaa quisij cayáán dínj yuvií rihaan chumií, qui'yaj so', ne ticavi' ndo'o yuvií tuvi' yuvií, qui'yaj so' a. Ne rqué nii 'o neé espadá xij rihaan so' a.

<sup>5</sup>Gaa ne gaa ca'néj matzinj le'ej selló va'nuj, gaa ne cunoj ca'mii xcuu va'nuj a. Ne cataj xo':

—Cuvá' so' ni'yaj so' ei —taj xo' a.

Gaa ne quene'enj se vaa cavii cuayó maruu, ne síí taj xráá cuayó ro', 'nij ra'a so' aga' romaná aga' a'néé ta'nga' nij rasuun a. <sup>6</sup>Gaa ne cunó 'unj nana cavii rej tanuu ca'anj nij xcuu, ne nana yo' cataj:

—Nu' sa'anj 'yaj canaán yuvií rque 'o güii ro', nu' yo' me quino vij kiló 'núú trigó do', vatan' kiló 'núú cebada do', qui'yáá so' á. Tzaj ne se tiri' so' casté chá do', na vinó do' ma' —taj nana yo' a.

<sup>7</sup>Gaa ne gaa ca'néj matzinj le'ej yo' selló ca'anj no tu'va yanj me se

cunó 'unj ca'mii xcuu ca'anj yo' a. Ne cataj xo':

—Cuvá' so' ni'yaj so' ei —taj xo' a.

<sup>8</sup>Gaa ne quene'én 'unj, ne dan me se cavii cuayó daj, ne síí taj xráá cuayó daj ro', ta'naj 'yaj avi' yuvií cu'naj so', ne rej xco so' ro', noco' rej ca'anj nij síí cavi' a. Gaa ne ca'ne' nii suun rihaan roj so' se vaa guun chij roj so' rihaan 'o ta'aj nij yuvií man rihaan chumií, ne nicaj roj so' neé espadá nicaj roj so' x'naa na'aan rque nicaj roj so' chi'ii yuvaa nicaj roj so' xcuu quij nicaj roj so', ticavi' roj so' man nij yuvií yo' a.

<sup>9</sup>Gaa ne gaa ca'néj matzinj le'ej selló 'un' no tu'va yanj yo', ne quene'én 'unj rej rque mesá altar, ne rque mesá altar me se naj nij nimán nij síí cavi' che'é se-nana Diose che'é yan nata' nij so' nana ya rihaan yuvií a. <sup>10</sup>Ne nucuaj ndo'o aguáj nij so', cataj nij so', ne:

—Ndaa me güii ca'ne' so' cacun' che'é nij síí man rihaan chumií, ne qui'yáá so' sayuun man nij so' che'é ton cayanj man núj qui'yaj nij so' ga. 'O se so' me síí vaa sa' inanj, ne síí uun chij ya rihaan núj mé so' á —taj nij nimán, aguáj nij so' a.

<sup>11</sup>Gaa ne rqué nii yatzíj xcaan catzií rihaan 'o 'o nij so', gaa ne cataj xna'anj nii rihaan nij so' se vaa gaa inaj nimán nij so' doj ndaa se quisij cavi' nu' nij tinúú nij so' síí 'yaj suun ga nij so' síí cavi' ndaa vaa cavi' ma'an nij so' a.

<sup>12</sup>Gaa ne quene'én 'unj se vaa ca'néj matzinj le'ej yo' selló vatan' no tu'va yanj yo', gaa ne cachén ndo'o yuún, ne guun maruu rihaan güii, ne nda' rá se vaa maruu yatzíj maruu ro', danj vaa güii a. Ne ase

vaa ton ro', danj vaa rihaan yavii a. <sup>13</sup>Ne cayuu nij yati' man xta' rihaan yo'óó, ne nda' rá se vaa ayuu chruj higó rihaan yo'óó gaa o' nana yuvaa raa chruun man chruj higó ne tinasqui' ndo'o nana raa chruun yo' ro', danj vaa ayuu yati' a. <sup>14</sup>Ne quixra' rej xta', ne ase vaa yanj gaa nacué nii yanj ro', danj guun rej xta' yo' a. Ne nasqui' nu' quij nu' yo'óó taj rihaan na ya'anj do' a. <sup>15</sup>Gaa ne dan me se nij síi nicaj suun do', nij síi sa' do', nij síi uun chij rihaan tanuu do', nij síi ru'vee do', nij síi nucuaj do', nu' nij mozó do', nu' nij síi ne uun mozó do', catúj yuve nij so' rque yu'uj yuvej do', rque nij yuvej naj quij do' a. <sup>16</sup>Gaa ne cataj nij so' rihaan nij quij rihaan nij yuvej rihaan:

—Cayuu nij soj xráá núj, ne caxrii yuve soj man núj, ne se gaa nanj quene'en síi taj rihaan chruun xlá sa' yo' man núj, ne se caxrj yuvaa matzinj le'ej yo' man núj ruguanj. <sup>17</sup>O se aj quisj güii guee güii caxrii yuvaa roj so' man núj, ne se quisj rá núj canicun' núj a ma' —taj nij so' rihaan quij do', rihaan yuvej do' a.

**Nana nihánj taj xna'anj che'é  
nij síi israelitá cata' ta'nga'  
caan rihaan che'é Diose a**

**7** Veé dan, gaa ne quene'en 'unj ca'anj se-mozó Diose nicun' ca'anj nij scúj chumii nihánj, ne caráán nij so' chrej rihaan ca'anj nij nana avii rihaan chumii, se cavii nij nana rihaan yo'óó rihaan na ya'anj rihaan a doj chruun rihaan a. <sup>2</sup>Ne ca'anj nij se-mozó Diose ro', aj ca'ne' Diose suun rihaan nij so' qui'yaj nij

so' sayuun man yo'óó do', man na ya'anj do' a. Dan me se quene'en 'unj yo'ó se-mozó Diose cavii rej síi güii, ne nicaj so' selló no se-ta'nga' Diose a. Dan me se caguáj so' rihaan ca'anj nij se-mozó Diose, cataj so', ne:

<sup>3</sup>—Se guun qui'yaj soj sayuun man yo'óó do', man na ya'anj do', man chruun do' ma'. Ca'ne' rá soj doj tzin', ne ndaa quisj cuta' núj ta'nga' caan rihaan nij síi 'yaj suun che'é Diose, ne ca'vee ei —taj so', caguáj so' a.

<sup>4</sup>Gaa ne cunó 'unj me daj nij so' cuta' nii ta'nga' caan rihaan, ne cientó táá yavij chihaa ca'anj mój yuvii me nij so', ne sij man 'o 'o x'ne' nij yuvii israelitá me uún nij so' a.

<sup>5</sup>Dan me se chuvij mój nij so' me ta'níi ta'nij si'no síi cu'naj Judá a. Ne chuvij mój nij so' me ta'níi ta'nij si'no síi cu'naj Rubén a. Ne chuvij mój nij so' me ta'níi ta'nij si'no síi cu'naj Gad a. <sup>6</sup>Ne chuvij mój nij so' me ta'níi ta'nij si'no síi cu'naj Aser a. Ne chuvij mój nij so' me ta'níi ta'nij si'no síi cu'naj Neftalí a. Ne chuvij mój nij so' me ta'níi ta'nij si'no síi cu'naj Manasés a. <sup>7</sup>Ne chuvij mój nij so' me ta'níi ta'nij si'no síi cu'naj Simeón a. Ne chuvij mój nij so' me ta'níi ta'nij si'no síi cu'naj Leví a. Ne chuvij mój nij so' me ta'níi ta'nij si'no síi cu'naj Isacar a. <sup>8</sup>Ne chuvij mój nij so' me ta'níi ta'nij si'no síi cu'naj Zabulón a. Ne chuvij mój nij so' me ta'níi ta'nij si'no síi cu'naj José a. Ne chuvij mój nij so' me ta'níi ta'nij si'no síi cu'naj Benjamín a.

**Nana nihánj taj xna'anj che'é  
nij síi man 'o 'o chuman' a**

<sup>9</sup>Veé dan, gaa ne quene'en 'unj que'ee ndo'o yuvii, ne taj vaj síi

guun nucuaj qui'yaj contá man nij yuvii a man chuguanj. Ne sí man cunudanj chuman' naj rihaan chumii me nij so', ne sí man 'o 'o x'ne' yuvii me nij so', ne sí a'mii nu' xna'ánj a'mii yuvii me uún nij so', ne dan me se canicun' nij so' rihaan chruun xlá sa' yo' do', rihaan matzinj le'ej yo' do' a. Ne yatzíj xcaan catzii nuú nij so', ne oro' nij so' ra'a chruun yuun a. <sup>10</sup>Ne nucuaj ndo'o caguáj nij so', cataj nij so', ne:

—Diose sí noco' ní' man sí taj rihaan chruun xlá sa' do', matzinj le'ej do', me roj sí tinanii man ní' rihaan sayuun adonj —taj nij so' a.

<sup>11</sup>Gaa ne cunudanj nij se-mozó Diose ro', canicun' nij so' nu' anicaj xrúun Diose chruun xlá sa' do', nij sí uun chij do', ca'anj nij xcuu do', gaa ne canicun' ruj nij so' rihaan chruun xlá sa' yo', ne toco' nij nij so' rihaan nij so' rihaan yo'óó, ne na'v'ij nij so' rihaan Diose a. <sup>12</sup>Ne cataj nij so':

—Veé danj gaa ya ei. Ve'é inanj ca'mii ní' rihaan Diose sí noco' ní' man nu' cavii nu' ca'anj á. So' me sí avii ndo'o raá, ne nago' ní' graciá rihaan so', ne so' me sí nucuaj ndo'o nu' cavii nu' ca'anj adonj. Veé danj gaa ya ei —taj nij so' ni'yaj nij so' Diose a.

<sup>13</sup>Gaa ne xna'anj yo'o tuvi' nij sí uun chij manj, cataj so':

—Ne nij sí nuu yatzíj xcaan catzii ro', me sij me nij so', ne me rej cavii nij so', rá so' ga —taj so', xna'anj so' manj a.

<sup>14</sup>Gaa ne cataj 'un'j rihaan so' a:

—Ne ne'én 'un'j me sí me nij so', man señor. Tzaj ne so' me sí ne'en, raj a —taj 'un'j rihaan so' a.

Gaa ne cataj so' rihanj a:

—Nij sí nihánj ro', me nij sí cachén rihaan que'ee ndo'o sayuun, gaa guun sayuun nocoo rihaan chumii adonj. Ne cavi' matzinj le'ej che'é nij so', ne cayanj ton man matzinj le'ej che'é nij so', ne canoco' nij so' man matzinj le'ej, ne che'é dan naruvii sagan' nij so', ne cunuu catzii sagan' nij so', qui'yaj ton cayanj m'an matzinj le'ej adonj. <sup>15</sup>Che'é dan me nicun' nij so' rihaan xrúun Diose chruun xlá sa', ne nuvii nigan' nicun' nij so' rá nuvii nocoo ne rej xta' 'yaj suun nij so' rihaan Diose, ne Diose sí taj rihaan chruun xlá sa' yo' ro', ma'an so' cayáán ga nij so', ne caráán so' rihaan sayuun che'é nij so' a. <sup>16</sup>Ne daj chihaa m'ij se quina'aaan uún rque nij so' do', se canacoo nij so' na do', se go' naán xráá nij so' do', se cunuú cachi' rá nij so' do', a ma'. <sup>17</sup>O se ma'an matzinj le'ej nicun' ma'an rej rihaan chruun xlá sa' yo' ro', cutumé man nij so', ne ca'anj n'icaj so' man nij so' rej xra' na sa', ne co'o nij so', gaa ne yo'o gaa i'na' nimán nij so', qui'yaj na yo' a. Ne ma'an Diose ro', me sí tinacoo na ayanj rihaan nij so' ei —taj sí uun chij yo' rihanj a.

**Nana nihánj taj xna'anj che'é selló yánj chij do', che'é aga' nuu squíí do' a**

**8** Gaa ne gaa ca'néj matzinj le'ej selló chij no' tu'va yanj yo', gaa ne yuun che'e cunuu dínj rej xta' 'o' yanéj orá a. <sup>2</sup>Gaa ne quene'én 'un'j chij nij se-mozó Diose nij sí nicun' rihaan Diose, se vaa rqué nii chij chruun a'yánj

rihaan nij so' a. <sup>3</sup>Gaa ne ca'na' yo'ó se-mozó Diose uún, ne canicun' so' rihaan mesá altar aga' oró mí nicun' rihaan xrúún Diose chruun xlá sa' a. Ne noco' ra'a so' aga' acaa squíí, ne aga' oró mí me aga' yo' a. Gaa ne rque ndo'o nii squíí man so' che'é rej ricatze' so' squíí rihaan mesá altar che'é nij síí vaa sa' rihaan Diose gaa achíín ni'yaj nij so' rihaan Diose a. <sup>4</sup>Gaa ne cavii yachruu squíí noco' ra'a se-mozó Diose yo' rihaan ma'an Diose, gaa cachíín ni'yaj nij so' rihaan Diose a. <sup>5</sup>Gaa ne dan me se ca'anj nicaj se-mozó Diose yo' aga' acaa squíí yo' rihaan mesá altar, gaa ne caraa ndo'o so' ru'vi' ya'an man rihaan mesá altar yo' rá aga', gaa ne tagüéj so' ya'an yo' rihaan chumií a. Gaa ne caguáj tu'vii, ne cariin ndo'o, ne quiraan ndo'o, ne cachén ndo'o yuún, qui'yaj se-mozó Diose yo' gaa tagüéj yo' squíí rihaan chumií a.

**Nana nihánj taj xna'anj daj guun gaa ca'yánj nij se-mozó Diose chij nij chruun a'yánj a**

<sup>6</sup>Gaa ne chij nij se-mozó Diose nicaj chij nij chruun a'yánj ro', yuun che'e guun rá nij so' ca'yánj nij so' nij chruun a'yánj yo' a.

<sup>7</sup>Gaa ne ca'yánj yo'o so' xrúún so', gaa ne maan yahij do', ya'an do', nachej ga ton me se caman' yo' rihaan chumií a. Gaa ne cacaa nu' 'o va'núj scuj yo'óo man rihaan chumií, ne cacaa 'o va'núj scuj nij chruun nicun' rihaan chumií, ne nu' coj chrin' ya'lij cacaa uún a.

<sup>8</sup>Gaa ne ca'yánj se-mozó Diose mozó vij chruun a'yánj, gaa ne cayuu 'o ya'an xij rque na ya'anj a.

Ne ase vaa quij xcaan vaa ya'an xij yo' a. Gaa ne 'o va'núj scuj na ya'anj yo' ro', cunuu ton a. <sup>9</sup>Ne cavi' 'o xcuu rihaan daj a va'núj xcuu man rque na ya'anj, ne quiri' 'o va'núj scuj nij rihoo chéé rihaan na ya'anj, qui'yaj ya'an yo' a.

<sup>10</sup>Gaa ne ca'yánj se-mozó Diose mozó va'núj chruun a'yánj, gaa ne cavii 'o yati' xij ndo'o rej xta', ne yati' yo' ro', ya'an inanj me yo', ne chuguun yo', ne adi' chuguun aga' taj ya'an raa ro', danj chuguun yo' a. Ne quiniy yati' yo' rque 'o va'núj scuj nij chráá man rihaan chumií do', rque nij na yu'uj man rihaan chumií do' a. <sup>11</sup>Ne se-chuvii yati' yo' ro', me “yati' e'”, ne cunuu e' nu' na quiniy yati' yo' rque, gaa ne cavi' que'ee yuvii, qui'yaj na e' yo', che'é se cunuu e' na yo', qui'yaj yati' a.

<sup>12</sup>Gaa ne ca'yánj se-mozó Diose mozó ca'anj chruun a'yánj, gaa ne quiran' chil'ii 'o va'núj scuj rihaan güii do', 'o va'núj scuj rihaan yavii do', 'o va'núj scuj nij yati' do', ne dan me se yo'o cunuu rmi' 'o va'núj scuj nij yo', ne dan me se ne cuchuguun nij yo' 'o va'núj scuj rej ranga' do', ne ne cuchuguun nij yo' 'o va'núj scuj rej nií do', a ma'.

<sup>13</sup>Gaa ne quene'én 'unj, ne cunó 'unj caguáj yo'o xtaa vaj tanuu rihaan risca' xta', ne dan me se cunó 'unj se vaa nucuj ndo'o caguáj xtaa yo', taj xo', ne:

—Ai. Ai. Ai. Nique nij síí ne rihaan chumií che'é sayuun quiran' nij so' asa' quisíj ca'yánj ya'núj nij se-mozó Diose síí nichrun' ca'yánj chruun a'yánj á — taj xtaa, caguáj xo' a.

**9** Gaa ne ca'yánj se-mozó Diose mozó 'un' chruun a'yánj, gaa

ne quene'én 'un̄j se vaa cavii yo'o yati' rej xta' quinij yo' rihaan yo'óó, gaa ne rqué nii raga' rihaan so' nuxra' so' tu'va yu'uj cunūu ndo'o rej man̄ nij nanā chree a. <sup>2</sup>Gaa ne nuxra' so' tu'va yu'uj cunūu ndo'o, gaa ne curihan̄j ndo'o catze' tu'va yu'uj yo', ne ase vaa catze' avii chrúún hornó xij ro', danj vaa catze' cavii tu'va yu'uj yo' a. Gaa ne caráán rihaan güii, ne guun rmi' rihaan chumi, qui'yaj catze' yo' a. <sup>3</sup>Gaa ne curihan̄j ndo'o rquí rque catze' yo', ne ca'an̄j nij rquí rihaan nu' chumi, gaa ne guun nucuaj nij rquí yo' qui'yaj nij xo' ndaa vaa 'yaj nij xcuun, qui'yaj nii a. <sup>4</sup>Gaa ne cataj xna'an̄j nii rihaan nij xo' se vaa se qui'yaj sayuun nij xo' man coj chrin̄ do', man coj do', man cuêj do', man nij chruun do' a. Maan se qui'yaj nij xo' sayuun man inan̄j nij yuvi nuvi' se-ta'nga' Diose cata' caan rihaan a. <sup>5</sup>Ne ne nó xcúún nij xo' ticavi' nij xo' man nij yuvi ma'. Maan se 'un̄' ya yavii qui'yaj ndo'o nij xo' sayuun man nij yuvi a. Ne a'ngaj ndo'o man yuvi rej xtáj nij xo' a. Ne ase vaa sayuun 'yaj xcuun gaa xtáj xcuun man yuvi vaa sayuun qui'yaj nij rquí man yuvi yo' a. <sup>6</sup>Ne güii vaj nij rquí yo' rihaan chumi me se guun ndo'o rá nij yuvi cavi' nij yuvi, tzaj ne se ca'vee cavi' nij yuvi a ma'.

<sup>7</sup>Ne nij rquí me se ase vaa cuayó taj sí ca'an̄j cunu' ro', danj vaa nij xo' curuvi' un̄ nij xo', ne ase vaa cachriin̄ aga' oró mí ro', danj vaa se nuu raa nij xo' a. Ne ase vaa rihaan yuvi ro', danj vaa rihaan nij xo' a. <sup>8</sup>Ne vaa yuvé raa nij xo', ne ase vaa yuvé raa chanā vaa yuvé raa

nij xo', ne ase vaa cúu yan' chuva vaa cúu yan' nij xo' a. <sup>9</sup>Ne caráán aga' hierró nu' rucuaa nij xo' a. Ne daj se uun rá' gaa unó' que'ee cuchri' xuun cuayó 'anj rej cunu' nii ro', danj guun raj gaa cunoj cariin scachee nij xo' gaa chéé nij xo' xta' a. <sup>10</sup>Ne ase vaa tane' xcuun vaa tane' nij xo', ne guun nucuaj nij xo' xtáj nij xo' man yuvi, ne che'é dan guun nucuaj nij xo' qui'yaj nij xo' sayuun man yuvi 'un̄' ya yavii a. <sup>11</sup>Ne se-mozó Diose sí tumé yu'uj cunūu ro', uun chij so' rihaan nij rquí yo' a. Ne se-chuvi se-mozó Diose yo' me Abaddón xna'an̄j hebreo, ne Apolión cu'naj so' xna'an̄j griego, ne nana yo' taj se vaa sij tiri' rasuun me so' a. <sup>12</sup>Dan me se navij 'o tuvi' nij sayuun quiran' nij yuvi, ne ataa ca'na' yavij roj sayuun quiran' yuvi a.

<sup>13</sup>Gaa ne dan me se ca'yánj se-mozó Diose mozó vatan' chruun a'yánj, gaa ne cunoj nana ca'mii 'o so' rej tanuu nij xcúu mesá altar aga' oró mí nicun' rihaan Diose a. <sup>14</sup>Gaa ne ca'mii so' rihaan se-mozó Diose mozó nicaj chruun a'yánj vatan', cataj so':

—Naché so' man ca'an̄j nij se-mozó Diose sí numii tu'va chráá xij cu'naj Eufates á —taj so' rihaan se-mozó Diose yo' a.

<sup>15</sup>Gaa ne nache so' ca'an̄j nij se-mozó Diose sí cune' Diose cavii maan orá yo', maan güii yo', maan yavii yo', maan yo' ya yo', che'é rej ticavi' nij so' 'o yuvi rihaan daj a va'nui yuvi man rihaan chumi nan̄j adonj. <sup>16</sup>Ne vij cientó míj míj síj taj xráá cuayó me nij síj nocó' man ca'an̄j nij se-mozó Diose yo',



taj nii cunoj a. <sup>17</sup>Ne dan me se gaa naqui'yaa nu' rasuun nihánj rihaan 'unj, qui'yaj se-mozó Diose yo', ne quene'én 'unj man nij cuayó do', man nij sí taj xráá nij cuayó do', ne nij so' ro', me se nicaj nij so' aga' caráán rucuaa nij so', ne dan me se no se maree ndo'o, ne no se maree riscal', ne no se míí, ndaa vaa chuguun yo'óo azufre acaa a. Ne ase vaa raq chuvaq vaa raq nij cuayó, ne curihanj ya'an curihanj catze' curihanj yo'óo azufre curihanj tu'va nij xo' a. <sup>18</sup>Ne che'é ya'an do', catze' do', yo'óo azufre do', curihanj tu'va nij cuayó ro', che'é dan cavi' 'o yuvií rihaan daj a va'nuj yuvií man rihaan chumií, qui'yaj nij xo' a. <sup>19</sup>O se guun nucuaj nij cuayó ticavi' nij xo' man yuvií che'é rasuun cavii tu'va nij xo' do', che'é tane' nij xo' do' a. 'O se ase vaa xcuáá vaa tane' nij xo', ne vaa raq xcuáá yo', ne chá nij xo' man yuvií, quene'enj a.

<sup>20</sup>Ne vaa yuvií quinanii rihaan nij cuayó yo', tzaj ne ne canicaj nimán nij so' tanáj xcqo nij so' chrej chi'ii ma'. Tananj yo'o na'vívij nij so' rihaan nij nana chree do', rihaan ya'anj cacój yuvií do', ne ya'anj cacój nij yuvií me se aga' oró míí do', aga' platá catzii do', aga' cobre maree do', yahij do', chruun do', me uun nij yo' a. Ne dan me se nuvi' rihaan yo' ni'yaj yo' do', nuvi' xréé yo' cunoj yo' do', a ma'. Ne chéé nij yo' do', a ma'. <sup>21</sup>Dan me se ne canicaj nimán nij yuvií ca'ne' rá nij yuvií ga suun ticavi' tuvi' do', ga suun a'mii ga sí chruun do', ga suun 'yaj cacun' ga chana do', ga suun 'yaj ituu si'yaj tuvi' do', a man adonj.

Nana nihánj taj xna'anj  
che'é yanj rque se-mozó  
Diose chá sí cu'naj Juan a

**10** Gaa ne quene'én 'unj yo'ó se-mozó Diose sí nucuaj ndo'o cavii rej xta' ne nanij rihaan yo'óo, ne nu' anicaj man so' niquee so' ngaa, ne nda' rá se vaa nicun' xcuáá cu'llúú ro', danj vaa nicun' raa so', ne chuguun nu' anicaj raa so', ne chuguun rihaan so', ndaa vaa chuguun güii a. Ne ase vaa chraan acaa vaa tacóo so' a. <sup>2</sup>Ne nicaj so' 'o yanj cunii a. Ne cuta' so' 'o tacóo so' rej nuva' so' rihaan na ya'anj, ne cuta' so' yo'óo tacóo so' rej nichruun so' rihaan yo'óo a. <sup>3</sup>Ne nucuaj ndo'o caguáj so', nda' adi' se aguáj chuvaq aguáj so' a. Ne gaa caguáj so' me se chij ya caguáj tu'vii cunoj a. <sup>4</sup>Ne gaa quisj chij caguáj tu'vii, gaa ne guun raj cachronj nana caguáj tu'vii rihaan yanj, tzaj ne cunoj nana cavii rej xta', ne nana cunoj taj:

—Ca'nej yuve so' nana caguáj tu'vii, ne se cachron so' nana yo' rihaan yanj ma' —taj nana cavii rej xta' cunoj a.

<sup>5</sup>Gaa ne se-mozó Diose sí nicun' tacóo rihaan na ya'anj do', rihaan yo'óo do', me se naxcaj ra'a so' rej nuva' so' rej xta', <sup>6</sup>ne cuta' so' raa Diose sí cayáán nu' cavii nu' ca'anj sí qui'yaj rej xta' ga nu' se man rej xta', sí qui'yaj chumií ga nu' se man rihaan chumií, sí qui'yaj na ya'anj ga nu' se man rque na ya'anj, se vaa se ca'vee guun raan a doj a ma'. <sup>7</sup>Dan me se asa' quisj güii ca'yanj se-mozó Diose mozó chij chruun a'yanj me se quisj nu' se

vaa guun rá Diose qui'yaj so', ndaa vaa nata' so' rihaan nij síf nata' se-nana so' síf 'yaj suun che'é so' a, taj se-mozó Diose yo' a.

<sup>8</sup>Gaa ne cavii doj nana rej xta', rej cavii nana cunoj asij rque doj, ne cataj nana yo':

—Cavii so' nicaj so' yanj nicaj se-mozó Diose síf taj tacóo rihaan na ya'anj do', rihaan yo'óo do' á — taj nana yo' rihanj a.

<sup>9</sup>Gaa ne cavii 'unj rihaan se-mozó Diose yo', ne cataj 'unj rihaan so' se vaa rque so' doj yanj cunii yo' rihanj a. Gaa ne cataj so' rihanj a:

—Veé yanj nihánj nicaj so', ne cha nu' so' man yo' a. Dan me se tu'vá so' ro', gaa tzi' ndo'o nda' adi' catzi' xtaan, tzaj ne rque so' me se guun e', qui'yaj yanj yo' adonj —taj se-mozó Diose yo' rihanj a.

<sup>10</sup>Gaa ne dan me se nicaj 'unj yanj cunii rque se-mozó Diose yo' rihanj, ne chá nu' 'unj man yo', ne ase tzi' catzi' xtaan ro', danj vaa tzi' yo' tu'vaj a. Ne gaa quisíj chaj man yo', ne cunu e' rquej, qui'yaj yo' a.

<sup>11</sup>Gaa ne cataj nii rihanj a:

—Vaa che'é ca'mii natáj uún so' che'é yuvii man que'ee chuman' man que'ee yo'óo nocoo do', che'é yuvii a'mii que'ee xna'ánj a'mii yuvii do', che'é que'ee síf nicaj suun rey do' ei —taj nii rihanj a.

Nana nihánj taj xna'anj che'é vij síf natá' rihaan yuvii che'é Diose a

**11** Gaa ne rque nii 'o' rihaa ase vaa 'o' vará a'née ta'nga' manj, ne cataj Diose rihanj a:

—Cavii so' ne xcaj ta'ngá' so' nuví nocoo rej ne Diose, ne xcaj ta'ngá' so' mesá altar, ne qui'yaj contá

so' nij síf na'víj rihaan Diose do' á. <sup>2</sup>Tzaj ne xa' rej rihaan nuví, tzaj ne se xcaj ta'ngá' so' man yo' ma'. 'O se ca'vee ca'na' nij síf yaníj rej yo', ne vij chihaa vij yavii yuun che'e ru'maan che'é nij so' nu' chuman' guee yo' adonj. <sup>3</sup>Ne cune' 'unj man vij roj síf nata' rihaan yuvii che'é 'unj, ne 'o' míj táa yavíj cientó ne táa ya'núj chihaa güii me se ca'mii natáj roj so' rihaan yuvii, ne cunuú roj so' yatzíj ya' a —taj Diose rihanj a.

<sup>4</sup>Roj so' ro', me roj chruun man chruj olivó raá do', roj aga' taj aga' ya'an nicun' rihaan síf 'nij ra'a chumii nihánj do' a. <sup>5</sup>Ne sese guun rá yo'o so' qui'yaj chi'ii so' man roj so', ne avii ya'an tu'va roj so', ne acaa síf taj ri'yunj man roj so', qui'yaj ya'an avii tu'va roj so', ne yuun che'e cavi' síf 'na' guun rá qui'yaj chi'ii man roj so' a. <sup>6</sup>Ne guun nucuaj roj so' caráán roj so' rej xta', che'é yan se caman' a doj maan nu' güii ca'mii natáj roj so' a. Ne guun nucuaj roj so' naqui'yaj roj so' ton man na a. Ne guun nucuaj roj so' qui'yaj chi'ii roj so' man chumii ndaa vaa me rá ma'an roj so' qui'yaj roj so' a.

<sup>7</sup>Ne asa' quisíj ca'mii natáj roj so' se-nana roj so', gaa ne cavii xcuu yuvaa yu'uj cunuú ndo'o yo' a. Ne cunu' xo' ga roj so', ne qui'yaj canaán xo', ne ticavi' xo' man roj so' a. <sup>8</sup>Gaa ne cúu man roj so' ro', quinaj uun yo' rihaan callé rá chuman' nocoo a. Ne chuman' nocoo yo' me se sese ca'mii cachron ní, ne Sodoma do', Egipto do', cu'naj chuman' yo' a. Ne yo' me rej cachron nii rihaan rcutze man ma'an síf 'nij ra'a man roj síf nata' yo' asij rque doj a.

<sup>9</sup>Ne cunudanj nij yuvii man daj a chuman' do', cunudanj nij yuvii a'mii nu' nij xna'ánj do', cunudanj nij yuvii man daj a yo'óo nocoo do', ni'yaj man roj sí cavi' va'núj güii táa yanée yo' a. Ne ne ca'vej rá nij yuvii yo' cachin' nii man roj so' rihaan yo'óo santó ma'.

<sup>10</sup>Ne nu' nij sí man rihaan chumii me se guun niha' ndo'o rá nij so' che'é se cavi' roj sí nata' yo', ne ndaa narque nij yuvii rasuun rihaan tuvi' nij yuvii che'é se cavi' roj so' a. Dan me se gaa vaa i'na' roj so' me quiran' ndo'o nij yuvii sayuun, qui'yaj roj so' a.

<sup>11</sup>Ne gaa quisij va'núj güii táa yanée yo', gaa ne catúj uún nana rque roj so', qui'yaj Diose, ne cunuu i'na' uún roj so', ne canicun' caya roj so', ne dan me se nu' nij yuvii quene'en man roj so' me se kuchu'vi' ndo'o nij so' a. <sup>12</sup>Gaa ne cuno roj so' nana nucuaj sca' ndo'o cavii rej xta', ne nana yo' cataj:

—Cavii roj soj ca'na' roj soj nihánj á —taj nana yo' cuno roj so' a.

Gaa ne catúj roj so' rque ngaa, cavii roj so' xta', ne ca'anj roj so' a. Dan me se nij sí taj ri'yunj man roj so' me se quene'en nij so' se vaa cavii roj so' rej xta' a.

<sup>13</sup>Ne maan orá dan cachén ndo'o yuún, ne canee 'o ve' rihaan daj a chí' ve' ne chuman' yo', ne cavi' chij mij yuvi, qui'yaj yuún, ne kuchu'vi' ndo'o yo'óo nij yuvi, ne guun che'e nij so' ca'mii sa' nij so' che'é Diose sí nicun' rej xta' a. <sup>14</sup>Dan me se quisij vij sayuun yo', ne nichrun' quisij sayuun va'núj a.

**Nana nihánj taj xna'anj daj  
guun gaa ca'yánj se-mozó Diose  
mozó chij chruun a'yánj a**

<sup>15</sup>Gaa ne dan me se ca'yánj se-mozó Diose mozó chij chruun

a'yánj, gaa ne ca'mii ndo'o nij sí man rej xta', cataj nij so':

—Nihánj me yuun che'e guun chij sí 'nij ra'a man ní', ne guun chij sí ca'néé so' tinanii man yuvi rihaan sayuun, ne dan me se guun chij roj so' rihaan chumii, ne dan me se yo'o guun chij Diose nu' cavii nu' ca'anj nanj adonj —taj nij sí man rej xta' a.

<sup>16</sup>Ne ico ca'anj nij sí uun chij taj rihaan chruun xlá sa' rej rihaan Diose me se ca'anj canicun' ruj nij so' rihaan Diose, ne toco' nij nij so' rihaan nij so' rihaan yo'óo, ne quina'vúj nij so' rihaan Diose a. <sup>17</sup>Dan me se cataj nij so':

—Narque núj graciá rihaan so', Diose sij 'nij ra'a man núj á. So' me sí guun nucuaj qui'yaj cunudanj a. Ne sí nicun' yaj mé so', sí nicun' asij naá mé so' á. Dan me se guun ni'yaj ní' se vaa yaj me se guun nucuaj ndo'o so', qui'yáa so', ne guun chij so' rihaan chumii a.

<sup>18</sup>Dan me se ca'maan rá nij sí man rihaan chumii ni'yaj nij so' man so', gaa ne ca'ná' so', ne caxrj yuvaa so' man nij so' a. Ne quisij güii ca'ne' so' cacun' che'é nij sí cavi' ne naru'vee so' rihaan nij sí 'yaj suun rihaan so' nij sí ca'mii natáj se-nana so' do', rihaan nij sí vaa sa' rihaan so' do', rihaan nij sí aráj cochroj rihaan so' do' a. Dan me se ca'vee se sí nique me nij so' ni', ca'vee se sí sa' atá suun me nij so' ni', tzaj ne naru'vee so' rihaan nij so' a. Ne tirí' so' man nij sí tiri' chumii a —taj ico ca'anj nij sí uun chij rihaan Diose a.

<sup>19</sup>Gaa ne naxra' ta'yaa rihaan nuví nocoo rej ne Diose rej xta', ne rá nuví nocoo me se curuvi'

se-chruñj Diose chruún guee qui'yaj nii gaa ca'mii Diose se-nana Diose rihaan sí cu'naj Moisés gaa naá a. Gaa ne quiraan ndo'o, ne cariin ndo'o, ne canuu ndo'o, ne cavii ndo'o nana yuvaa, ne caguáj tu'vii, ne cachén yuún, ne caman' ndo'o maan yahij nanj adonj.

Nana nihánj taj xna'anj che'é chana do', che'é xcuáa tu'vii do', curuvi' rej xta' a

**12** Gaa ne dan me se naqui'yaa lo rasuun nocoo curuvi' rej xta' rihaan 'unj, qui'yaj Diose, ne chana me yo', ne sagan' chana yo' ro', me güii, ne táa tacóo no' xráa yavii a. Ne nuu raá no' lo cachriin no chuj yati' a. <sup>2</sup>Ne chana yo' ro', nuú rque, ne ve'lee uxrá rque no' che'é se me rá no' cuchruj no' ne'ej, ne che'é dan ta'vee ndo'o no' a. <sup>3</sup>Ne naqui'yaa uún yo' rasuun rej xta' rihaan 'unj, qui'yaj Diose, ne xcuáa tu'vii xij maree me yo' a. Ne vaa chij raá xo', ne chi' cúu táa raá xo', ne chij cachriin nuú raá xo' a. <sup>4</sup>Ne tane' xo' me se cuxuun yo' yo'o va'núj scuj nij yati' man rej xta', ne cayuu nij yati' rihaan yo'óó, qui'yaj xo' a. Ne canicun' xcuáa tu'vii yo' rihaan chana cuchruj ne'ej, che'é rej cha nu' xo' man ne'ej cuchruj chana yo' a. <sup>5</sup>Gaa ne cuchruj no' ne'ej sno'o, ne so' ro', me sí nıcaj vará hierró ne cutumé man cunudanj nij yuvii man rihaan chumii a. Gaa ne ca'néj nii ta'nı́ chana yo', ne ca'anj nıcaj nii man ne'ej rihaan Diose rej táa so' rihaan chruun xlá sa' yo' uun chij so' a. <sup>6</sup>Gaa ne cunanj chana ndaa rej tacaan rej qui'yaj ma'an Diose cane

no', che'é rej ca'vee cayáan no', ne ca'vee rque Diose se cha no' lo mı́ táa yavı́ cientó ne táa ya'núj chihaa güii a.

<sup>7</sup>Gaa ne guun che'e nij sí man rej xta' cunu' nij so' a. Dan me se se-mozó Diose sí cu'naj Migueé ga yo'óo nij se-mozó Diose nuu rihaan so' me se cunu' ndo'o nij so' ga xcuáa tu'vii a. Ne tananj xcuáa tu'vii do', nij se-mozó ma'an xcuáa tu'vii do', cunu' ndo'o nij so' ga nij tuvi' se-mozó Diose Migueé, <sup>8</sup>tzaj ne ne guun nucuaj nij so' qui'yaj canaán nij so' man Migueé a man adonj. Ne taj rej cumán nij so' rej xta', qui'yaj nij tuvi' Migueé a man chuguanj. <sup>9</sup>Ne xcuáa tu'vii yo' ro', xcuáa cayáan asij naá tempó me xo', ne sí chree do', Satanás do', cu'naj xo', ne sí tiha' yu'unj man cunudanj nij yuvii man rihaan chumii me uún xo' nanj adonj. Ne go' nii man xcuáa tu'vii xij yo' rihaan chumii ga nij se-mozó so' a. <sup>10</sup>Gaa ne cunó 'unj nana nucuaj ca'mii yo'óo so' rej xta', ne cataj so': —Nihánj me se guun che'e Diose tinanii Diose man yuvii rihaan sayuun, ne guun nucuaj ndo'o so', ne guun chij ndo'o so' adonj. Ne guun chij sí ca'née so' tinanii man yuvii rihaan sayuun a. <sup>11</sup>Q se sí cuta' cacun' xráa tinúú ní' nuvii nıgan' rihaan Diose ro', quirii yanı́ nii man so' nanj adonj. <sup>12</sup>Ne qui'yaj canaán nij tinúú ní' man xcuáa tu'vii che'é ton cayanj man matzinj le'ej yo' che'é nij tinúú ní', ne che'é se nata' nij so' nana ya sa' rihaan yuvii ro', che'é dan qui'yaj canaán nij so' rihaan xcuáa tu'vii yo' nanj ei. Ne nij so' me se ne chucu'vi'

nij so' sese cavi' nij so' che'é nana sa' nata' nij so' ma'. <sup>12</sup>Che'é dan guun niha' rá nij soj rej xta' do', sij ne rej xta' do' ei. Tzaj ne nique ndo'o soj sij man rihaan chumii do', na ya'anj do', nanj adonj. 'O se quiri'íj nii man síi chree rihaan roj soj, ne che'é dan nuu yuvaa uxrá rá so' nanj chuguanj. 'O se ne'en síi chree se vaa nichrun' ca'na' sayuun quiran' so' nanj ei —taj nana ca'mii yo'o so' rej xta' a.

<sup>13</sup>Gaa ne dan me se gaa xcax xcuáa tu'vii yo' cuentá se vaa quiri'íj nii man xo' rihaan chumii, gaa ne canoco' ndo'o xo' man chana cuchruij ne'ej yo' a. <sup>14</sup>Tzaj ne rqué nii vij scachee xtaa xij man chana, che'é rej ca'vee cavii no' ca'anj no' rej tacaan rej ne no' qui'yaj Diose, ne yo' me rej rque Diose se cha no' va'nuij yo' táa yanée, ne gan' ndo'o cunanj no' rihaan xcuáa tu'vii a. <sup>15</sup>Tzaj ne quirii ndo'o xcuáa yo' na tu'va xo' rej vaj chana, ne ase vaa chráa vaa na ca'née xo' rej vaj chana, che'é rej guun rá xo' rnuu chana qui'yaj chráa yo', rá xo' a. <sup>16</sup>Gaa ne racuíj yo'óo man chana, ne dan me se nuxra' yo'óo tu'va yo'óo, ne chumánj yo'óo nu' chráa quirii xcuáa tu'vii tu'va yo' a. <sup>17</sup>Gaa ne ca'maan ndo'o rá xcuáa tu'vii ni'yaj xo' man chana, gaa ne cavii xo' cunu' xo' ga yo'óo nij ta'níi no' síi uno rihaan Diose síi nata' se-nana Jesucristó rihaan yuvii a. Gaa ne canicun' xo' rihaan yo'óo chruu naj tu'va na ya'anj a.

**Nana nihánj taj xna'anj che'é xcuu yuvaa cavii na ya'anj a**

**13** Gaa ne quene'én 'unj se vaa cavii 'o xcuu yuvaa rque

na ya'anj, ne hij ya raa xo', ne chi' cúu raa hij cúu yave xo', ne táa chi' cachriin raa nij cúu taj raa xo' a. Ne quij ndo'o vaa se-chuvii xo' nó rihaan xo' a. <sup>2</sup>Ne ase vaa sni'yó vaa xo', ne ase vaa tacóo xcuu osó vaa tacóo xo', ne ase vaa tu'va chuvaá vaa tu'va xo' a. Ne xcuu yuvaa cavii rque na ya'anj ro', guun nucuaj ndo'o xo' guun hij xo', qui'yaj xcuáa tu'vii a. <sup>3</sup>Ne yo'o raa xo' ro', aj quiran' chi'ii ndaa se daj doj se cavi' xo', tzaj ne quinahuun sa' uún man xo' a. Ne caráya'anj nij yuvii man nu' rihaan chumii ni'yaj nij yuvii man xcuu yuvaa yo', <sup>4</sup>ne quina'víj nij yuvii rihaan xcuáa tu'vii yo', che'é se guun nucuaj xcuu yuvaa yo' guun hij yo', qui'yaj ma'an xcuáa tu'vii yo' a. Ne quina'víj uún nij yuvii rihaan xcuu yuvaa uún, cataj nij yuvii:

—Me 'ó síi ca'vee qui'yaj ndaa vaa 'yaj xcuu yuvaa nihánj ga. Taj vaj a doj síi guun nucuaj cunu' ga xo' ma' —taj nij yuvii ni'yaj nij yuvii man xcuu yuvaa yo' a.

<sup>5</sup>Gaa ne ca'vej rá Diose guun nucuaj xo' ca'mii xta' ndo'o xo' ndaa rihaan ma'an Diose a. Ne ca'vej rá Diose guun hij xo' vij chihaa vij yavii a. <sup>6</sup>Gaa ne dan me se ca'mii ndo'o xo' nana chi'ii ni'yaj xo' man Diose do', ve' mantá rej ne Diose do', che'é nij síi ne rej xta' ga Diose do' a. <sup>7</sup>Ne ca'vej rá Diose cunu' xo' ga nij síi vaa sa' nimán rihaan Diose, ne dan me se qui'yaj canaán ya xo' man nij so' a. Ne ca'vej rá Diose guun hij xo' rihaan 'o 'o ta'aj yuvii do', rihaan nij yuvii man cunudanj chuman' naj rihaan chumii do', rihaan nij yuvii a'mii

cunudañj nij xna'ánj a'mii yuvií do', rihaan nij yuvií man nu' nij yo'óo nocoo do' a. <sup>8</sup>Ne quina'víj cunudañj nij yuvií man rihaan chumii rihaan xo' a. Ne nij sí quina'víj rihaan xo' me se nuvi' se-chuvii nij so' no rihaan danj matzinj le'ej sí cavi' rihaan rcutze, ne che'é dan se gaa i'na' nij so' rihaan Diose nu' cavii nu' ca'anj ma'. Ne nij sí ne quina'víj rihaan xcuu yuvaa yo' me se aj nó se-chuvii nij so' rihaan yanj yo' asij ataa qui'yaj Diose chumii nanj adonj.

<sup>9</sup>Dan me se sese taj yu'uj xréé yo'o so', ne no xcúun so' cunoo so' nana nihánj adonj. <sup>10</sup>Dan me se sí 'yaj atúj yuvií taga' ro', vaa güüi catuu ma'an so' uún nanj adonj. Ne sí o' neê espadá man tuvi' me se cavi' ya ma'an so', qui'yaj neê espadá nanj adonj. Nihánj me se xcaj ní cuentá che'é nij sí vaa sa' rihaan Diose, se vaa yo'o Diose gaa nucuaj rá nij so', ne yo'o Diose cuchuman rá nij so' ni'yaj nij so', ne yo'o gaa nucuaj nimán nij so' rihaan sayuun ei.

**Nana nihánj taj xna'anj che'é xcuu yuvaa cavii rque yo'óo a**

<sup>11</sup>Gaa ne quene'én 'unj yo'ó xcuu yuvaa cavii rque yo'óo, ne táa víj cúu raq xo', ne ase vaa cúu taj raq matzinj le'ej ro', danj vaa cúu taj raq xo' a. Ne a'mii xo' ndaa vaa a'mii ma'an xcuáá tu'vii a. <sup>12</sup>Ne dan me se ca'na' xo' rihaan xcuu yuvaa cavii rque na ya'anj, ne guun chij xo' rihaan yuvií ndaa vaa uun chij ma'an xcuu cavii rque na ya'anj yo' a. Dan me se quina'víj nij yuvií man nu' rihaan chumii rihaan xcuu yuvaa

cavii rque na ya'anj xcuu nahuun sa' gaa daj doj se cavi', qui'yaj xcuu yuvaa cavii rque yo'óo yo' a. <sup>13</sup>Ne qui'yaj suun ndo'o xo' suun nocoo quene'en nij yuvií, ne ndaa cavii ya'an rej xta' ne quiniy ya'an rihaan yo'óo, qui'yaj xo' a. <sup>14</sup>Dan me se qui'yaj suun xo' suun nocoo rihaan xcuu yuvaa cavii rque na ya'anj yo', qui'yaj ma'an xo', ne che'é suun nocoo yo' me se tiha' yu'unj ndo'o xo' man nij sí man rihaan chumii, ne cataj xo' rihaan nij so' se vaa qui'yaj nij so' 'o se-tinanga' xcuu cavii rque na ya'anj yo' xcuu quiran' chi'ii qui'yaj neê espadá ne cunuu i'na' uún a. <sup>15</sup>Dan me se guun nucuaj xo' qui'yaj xo' nayón nana nimán se-tinanga' xcuu cavii rque na ya'anj yo', ne qui'yaj uún xo' ca'mii se-tinanga' yo', ne taran' nij sí na'vej rá na'vij rihaan se-tinanga' yo' ro', me se ticavi' xo' man taran' nij so' a. <sup>16</sup>Gaa ne qui'yaj xcuu cavii rque yo'óo yo' fuerzá man cunudañj yuvií se vaa cuta' nii ta'nga' ra'a nij yuvií rej nuva' nij yuvií, ne se taj, ne caan rihaan nij yuvií cata' ta'nga' a. Dan me se danj qui'yaj nii man nij sí ata suun do', man nij sí chéé ma'an do', man nij sí nique do', man nij sí ru'vee do', man nij mozó do', man nij sí ne uun mozó do' a. <sup>17</sup>Ne dan me se sese nuvi' ta'nga' yo' ra'a yo'o so' do', rihaan yo'o so' do', ne ne ca'vee quiraan so' rasuun do', cutu'vee so' rasuun do', qui'yaj se-tinanga' xcuu yo' a man adonj. Ne ta'nga' yo' ro', me se-chuvii xcuu cavii rque na ya'anj, ne dan me se número me yo' ei.

<sup>18</sup>Ne nihánj me se cavii raq soj sij nayaa nana nihánj, ne sese cuu

raa soj, ne nuchruj raa soj daj taj se-número xcuu yuvaa cavii rqe na ya'anj yo' ei. 'O se número yo' ro', me se-chuvii yo'o snó'o nanj chuguanj. Ne vatan' cientó táa ya'núj chihaa vatan' me número yo' ei.

Nana nihánj taj xna'anj che'é  
cientó táa yavíj chihaa ca'anj mīj  
nij síí vaa sa' rihaan Diose a

**14** Gaa ne quene'én 'unj se vaa nicun' matzinj le'ej yo' raa quij cu'naj Sion, ne nicun' 'o cientó táa yavíj chihaa ca'anj mīj nij so' ga so', ne no se-chuvii matzinj le'ej do', se-chuvii Rej matzinj le'ej do', caan rihaan nij so' a. <sup>2</sup>Gaa ne cunó 'unj se vaa ca'mii nana cavii rej xta', ne ase vaa uun ayuj vaj chráa xij do', ase uun aguáj ndo'o tu'vii do', danj vaa nana yo', ne ase vaa chra' achraá nii ya'ánj vaa nana yo' a. <sup>3</sup>Ne achraá nij so' chra' naca inanj rihaan síí taj chruun xlá sa' yo' do', rihaan ca'anj nij xcuu nicun' nu' anicaj chruun xlá sa' do', rihaan nij síí uun chij do' a. Ne taj vaj a 'ó nij síí ca'vee nari' cachraa chra' yo' ma'. Maan se orún' cientó táa yavíj chihaa ca'anj mīj nij síí vaa sa' yo' ro', me nij síí guun nucuaj nari' chra' yo' nanj adonj. Nij so' ro', me nij síí narii Diose rihaan chumii, ne nij so' me síí tinanii matzinj le'ej man rihaan sayuun gaa cavi' so' a. <sup>4</sup>Ne ne cunu chi'ii nij so' rihaan Diose che'é chana ma'. 'O se síí vaa sa' inanj me taran' nij so' nanj adonj. Ne síí canoco' xcó matzinj le'ej me rej ma'an vaj xo' me uún nij so' a. Ne nij so' me nij síí táa yaan rihaan taran' yo'ó nij

síí man rihaan chumii síí cunuu sa' rihaan Diose do', rihaan matzinj le'ej do', gaa cavi' matzinj le'ej yo' a. <sup>5</sup>Ne dan me se taj vaj a doj nana ne ne ca'mii nij so' ma'. 'O se sij vaa sa' inanj me nij so' nanj ei.

Nana nihánj taj xna'anj daj ca'mii  
va'nuj nij se-mozó Diose a

<sup>6</sup>Gaa ne quene'én 'unj yo'ó se-mozó Diose vaj tanuu rihaan risca' xta', ne nicaj so' nana sa' nana che'é se vaa quiran' yuvii nu' cavii nu' ca'anj nata' so' rihaan nij síí man cunudanj nij yo'óo nocoo man rihaan chumii do', rihaan nij síí man cunudanj nij chuman' do', rihaan nij síí a'mii cunudanj nij xna'ánj a'mii nij yuvii do', rihaan 'o 'o ta'aj nij yuvii man rihaan chumii do' a. <sup>7</sup>Gaa ne dan me se nucuaj ndo'o ca'mii so', cataj so', ne: —Caraa cochroj nij soj rihaan Diose, ne ve'é ca'mii soj che'é so' ei. 'O se aj quisij orá ca'ne' so' cacun' che'é yuvii nanj adonj. Dan me se na'vij soj rihaan so', che'é se so' me síí qui'yaj rej xta' do', yo'óo do', na ya'anj do', rej avii na do' a —taj se-mozó Diose yo' cunoj a.

<sup>8</sup>Gaa ne canoco' yo'ó se-mozó Diose xcó tuvi' so', ne cataj so': —Aj quiri' nu' chuman' nocoo chuman' cu'naj Babilonia, ne qui'yaj ndo'o nij síí man rihaan chumii cacun' chi'ii, qui'yaj chuman' yo', ne nihánj me se caxrii yuvaa Diose man nij so' che'é cacun' chi'ii qui'yaj nij so' chuguanj —taj yo'ó se-mozó Diose yo' a.

<sup>9</sup>Gaa ne canoco' se-mozó Diose mozó va'nuj rej xcó roj tuvi' so', ne nucuaj ndo'o ca'mii so', cataj so', ne:



— Sese na'v'ij yo'o so' rihaan xcuu yuvaa yo' do', rihaan se-tinanga' xcuu yuvaa yo' do', ne sese ca'vej rá yo'o so' cata' ta'nga' caan rihaan so' do', ra'a so' do', <sup>10</sup>ne ya co'lo so' na vinó sayuun nucuaj caraa Diose rque tazá, ne na vinó yo' ro', me sayuun qui'yaj Diose man so' asa' caxrij yuvaa Diose man so', ne dan me se cacaa so' rihaan ya'an do', rihaan yo'óo azufre' acaa do', ni'yaj nij se-mozó Diose mozó vaa sa' do', ni'yaj matzinj le'ej do' a. <sup>11</sup>Ne dan me se nu' cavii nu' ca'anj cavii catze' rej quiran' nij so' sayuun, ne yo'o danj quiran' nij so' nuvii nigan' nanj adonj. Danj quiran' nij sí na'v'ij rihaan xcuu yuvaa yo' do', rihaan se-tinanga' xcuu yuvaa yo' do', sí ca'vej rá cata' ta'nga' se-chuvii xcuu yo' do' a —taj se-mozó Diose mozó va'nuj yo' a.

<sup>12</sup>Ne nihánj me rej xcaj ní' cuentá che'é nij sí vaa sa' rihaan Diose, se vaa yo'o vaa nucuaj nimán nij so' rihaan sayuun ei. 'O se nij so' me sí yo'o uno nana taj xna'anj Diose, ne yo'o amán rá nij so' ni'yaj nij so' Jesucristó a.

<sup>13</sup>Gaa ne cunó 'unj yo'ó nana cavii rej xta', ne nana yo' cataj rihanj a:

—Cachron so' nana nihánj rihaan yanj á. Cachron so' se vaa nij sí noco' man sí 'nij ra'a man soj me se sese cavii' nij so' rej rihaan yaj, ne vaa che'é guun niha' rá nij so' ei. 'O se cavii sa' nij so' nanj á. Ne Nimán Diose taj se vaa ca'ne' rá nij so' ga suun 'yaj suun, ne naraan rá nij so' a. 'O se yuun che'e cavii sa' nij so' che'é suun sa' aj qui'yaj suun nij so' adonj, cachron so' á —taj nana cavii rej xta' yo' a.

**Nana nihánj taj xna'anj che'é  
sayuun quiran' nij sí man  
rihaan chumii nihánj a**

<sup>14</sup>Gaa ne quene'én 'unj se vaa curuvi' 'o ngaa catzii rej xta', ne táá 'o sí nicaj yu'unj man yuvii xráá ngaa, ne nuu raa so' 'o cachriin aga' oró míí, ne noco' ra'a so' 'o aga' seraa cuyuu a'ne' coj, ne sihaa uxrá seraa yo' a. <sup>15</sup>Gaa ne yo'ó se-mozó Diose curihanj rque nuví nocoo, ne nucuaj ndo'o caguáj so' rihaan sí taj xráá ngaa yo' a. Dan me se cataj so', ne:

—Tacuachén so' sagá' so' aga' sihaa tacóo nij rasuun man rihaan yo'óo, ne cutá so' se man rihaan yo'óo cuaj ei. 'O se quisij orá cuta ní' se man rihaan yo'óo nanj adonj. 'O se aj cachij nu' se man rihaan yo'óo nanj á —taj se-mozó Diose rihaan sí taj xráá ngaa yo' a.

<sup>16</sup>Gaa ne sí taj xráá ngaa yo' ro', me se tacuachén so' saga' so' tacóo nij rasuun man yo'óo, ne dan me se cuta so' nu' rasuun cachij man rihaan yo'óo yo' a.

<sup>17</sup>Gaa ne curihanj yo'ó se-mozó Diose uún rque nuví nocoo ne rej xta', ne ma'an so' nicaj yo'ó aga' seraa cuyuu sihaa uún a. <sup>18</sup>Gaa ne curihanj yo'ó se-mozó Diose uún rej nicun' mesá altar, ne sí guun chij rihaan ya'an me so', ne nucuaj ndo'o caguáj so' rihaan sí nicaj yo'ó aga' sihaa yo' a. Dan me se cataj so', ne:

—Tacuachén so' sagá' so' aga' seraa sihaa tacóo nij rasuun man rihaan yo'óo, ne naquiyaj chre' so' nij chruj uvá cachij rihaan yo'óo á. 'O se aj cané nu' nij chruj uvá nanj ei —taj so' rihaan tuvi' mozó so' a.

<sup>19</sup>Gaa ne dan me se tacuachén se-mozó Diose yo' saga' so' aga' seraa tacóo nij rasuun man rihaan yo'óo, gaa ne naquiyaj chre' so' nij chruj uvá cachij man rihaan chumi, gaa ne caraa sa' so' nij chruj uvá yo' rque 'o xruj xij rej rii nii na man nij chruj uvá, ne dan me se rej yo' me rej quiran' uxrá nij chruj uvá yo' sayuun qui'yaj Diose vaa nanj adonj.

<sup>20</sup>Gaa ne dan me se rej tu'va chuman' quirii nii man chruj uvá, ne rej yo' me canuu nii man chruj uvá yo', ne curihanj ndo'o ton rque xruj xij yo', ne quisij ton yo' ndaa tu'va nij cuayó yo' rej nuu rtá, ne va'nuj cientó táa yo'óo icó kilómetro ya cunanj ton yo' rej gan' rihaan yo'óo a.

Nana nihánj taj xna'anj che'é chij se-mozó Diose nij síi nicaj sayuun a

**15** Gaa ne quene'én 'unj yo'óo rasuun curuvi' rej xta' qui'yaj Diose, ne se xij ndo'o me yo', ne rasuun caráya'anj yá' me yo' a. Dan me se quene'enj chij se-mozó Diose, ne chij sayuun ca'na' me nicaj nij se-mozó Diose yo' a. Ne asa' quisij guun sayuun yo' rihaan chumi qui'yaj Diose, gaa ne ca'ne' rá Diose ga suun axrij yuvaa man chumi a.

<sup>2</sup>Gaa ne quene'én 'unj na ya'anj, ne ndaa raan ma'an rihaan na ya'anj yo', ne ase vaa raan vidrió ro', danj vaa raan yo', ne ase vaa ya'an vaa yo', ne nij síi qui'yaj canaán rihaan xcuu yuvaa yo' do', rihaan se-tinanga' xcuu yuvaa yo' do', rihaan número un se-chuvii xcuu yuvaa yo' do', nij so' me nij síi nicun' rihaan na ya'anj vidrió yo',

ne nicaj nij so' ta'anj Diose nicun' nij so' yo' a. <sup>3</sup>Ne achraá nij so' chra' qui'yaj síi cu'naj Moisés síi qui'yaj suun che'é Diose gaa naá, ne xra' matzinj le'ej me chra' yo' a. Ne nihánj me nana cachraá nij so' a:

—Xij ndo'o ne ya'anj ndo'o vaa nu' suun qui'yaj suun so', Diose sij ne'en qui'yaj cunudanj sij 'nij ra'a man núj á. Tucuáán nica ne tucuáán ya me nu' tucuáán cuchruj so', ne síi nicaj suun rey uun chij rihaan cunudanj yuvii mé so' á.

<sup>4</sup>Me síi se ca'vej rá caraa cochroj rihaan so', ga man Señor. Ve'é ca'mii cunudanj yuvii ni'yaj nij yuvii man so' a. 'O se orún' so' me síi sa' inanj, ne ca'na' cunudanj nij yuvii man rihaan chumi, ne na'vij nij yuvii rihaan so' á. 'O se quene'en nij so' nu' nij suun nica qui'yaj suun so' adonj —me chra' cachraá nij síi qui'yaj canaán yo' a.

<sup>5</sup>Gaa ne quene'én 'unj se vaa naxra' ta'yaa rihaan nuvií nocoo rej ne Diose rej xta' rej xcax yuvii cuentá che'é so' a. <sup>6</sup>Gaa ne curihanj chij nij se-mozó Diose nij síi nicaj sayuun rque nuvií nocoo yo', ne nuu nij so' yatzij linó sa' inanj naruvii chuguun, ne 'nij catuun nij so' merque caxra' anó ndaa rucuaa nij so', ne merque aga' oró míi inanj me nij merque yo' a. <sup>7</sup>Gaa ne yo'óo tuvi' ca'anj nij xcuu ro', rque xo' chij co'oo aga' oró míi rihaan chij nij se-mozó Diose, ne sayuun qui'yaj Diose caxrij yuvaa Diose man nij síi man rihaan chumi ro', maan ndaa araa ma'an sayuun yo' rque nij co'oo a. Ne Diose, tzaj ne so' me síi gaa i'na' nu' cavii nu' ca'anj adonj. <sup>8</sup>Ne che'é se ve'é ndo'o

'yaj Dioso ne che'é se nucuaj ndo'o Dioso, che'é dan caraa catze' rá nuví nocoo yo', ne taj vaj sí guun nucuaj catuu rque nuví nocoo yo' ndaa se quisij chij nij sayuun nicaj chij nij se-mozó Dioso tagüej nij so' rihaan chumij a.

Nana nihánj taj xna'anj che'é sayuun man rque co'oo nicaj chij nij se-mozó Dioso a

**16** Gaa ne cunó 'unj se vaa nucuaj ca'mii 'o sí ne rá nuví nocoo yo' rihaan chij nij se-mozó Dioso, cataj so':

—Cavii nij soj, tucuayuu soj se man rque se-co'oo soj rihaan yo'óó, che'é rej caxrii yuvaa Dioso man nij sí man rihaan yo'óó á —taj sí ne rá nuví nocoo yo' a.

<sup>2</sup>Gaa ne guun yaan 'o se-mozó Dioso, cavii so' ca'anj so', ne tucuayuu so' se nuu rque se-co'oo so' rihaan yo'óó a. Gaa ne dan me se canó ndo'o luj ri'yuj chi'ii man nij sí no se-ta'nga' xcuu yuvaa sí na'v'ij rihaan se-tinanga' so' a.

<sup>3</sup>Gaa ne se-mozó Dioso mozó vij, ne tucuayuu so' se man rque se-co'oo so' rihaan na ya'anj yo', ne ase vaa ton man xngá ro', danj vaa nu' na ya'anj yo' a. Gaa ne cunudanj nij xcuu do', xcuaj do', cavi' rque na ya'anj yo' a.

<sup>4</sup>Gaa ne se-mozó Dioso mozó va'nuj, ne tucuayuu so' se man rque se-co'oo so' rihaan nij chráá do', rihaan nij rej avii na do' a. Gaa ne guun ton man nu' nij na yo' a.

<sup>5</sup>Gaa ne cunó 'unj ca'mii se-mozó Dioso sí tumé na, se vaa cataj so':

—Cunaj uxrá 'yáá so' sij nicun' yaj sij nicun' asij naá, ne sij sa' inanj

mé so' á. 'O se ma'an so' me sí cataj xna'anj se vaa guun nu' nij rasuun nihánj nanj adonj. <sup>6</sup>O se nij sí man rihaan chumii ro', tucuayuu nij so' ton man nij sí sa' do', ton man nij sí nata' se-nana so' do', rihaan yo'óó, ne nihánj me se rqué so' ton rihaan nij so' co'o ma'an nij so' yaj adonj. Dan me se yaj me nayon ya cuentá ndaa vaa quilyaj nij so' gaa naá ei —taj se-mozó Dioso sí tumé na yo' a.

<sup>7</sup>Gaa ne cunó 'unj se vaa ca'mii mesá altar, ne cataj yo':

—Veé danj vaa, Dioso sij 'nij ra'a man núj sij guun nucuaj quilyaj cunudanj a. Nana ya ne nana nica me nu' nana cataj xna'anj so' gaa ca'né' so' cacun' che'é nij yuvii yo' —taj yo' uún a.

<sup>8</sup>Gaa ne se-mozó Dioso mozó ca'anj ro', me se tucuayuu so' se man rque se-co'oo so' rihaan güii a. Gaa ne guun nucuaj güii cacaa nij yuvii quilyaj güii a. <sup>9</sup>Gaa ne cacaa ndo'o nij yuvii, gaa ne dan me se ndá se Dioso me sí uun chij rihaan nu' nij sayuun yo', tzaj ne ca'mii chi'ii nij yuvii ni'yaj nij yuvii man Dioso, ne ne canicaj nimán nij yuvii ca'mii sa' nij yuvii che'é Dioso a ma'.

<sup>10</sup>Gaa ne se-mozó Dioso mozó 'unj ro', me se tucuayuu so' se man rque se-co'oo so' rihaan chruun xlá rej taj xcuu yuvaa a. Gaa ne yuun che'e cunuu rmi' nu' rej quirii ta'nga' xo' rihaan, ne dan me se que'ee ndo'o man nij sí guun chij xo' rihaan, ne ndaa chá ruj ma'an nij so' tu'va nij so' che'é yan a'ngaj man nij so' a.

<sup>11</sup>Gaa ne dan me se ca'mii chi'ii nij so' che'é Dioso, che'é se que'ee

ndo'o man nij so' ne canó luj chi'ii ri'yuj man nij so' a. Tzaj ne ne canicaj nimán nij so' tanáj nij so' se chi'ii qui'yaj nij so' a ma'.

<sup>12</sup>Gaa ne se-mozó Diose mozó vatan' ro', me se tucuayuu so' se man rque se-co'oo so' rihaan chráá xij cu'naj chráá Eufates, gaa ne canacoo nu' na man rque chráá yo', qui'yaj so' a. Ne dan me se guun chráá yo' chrej cachén nij sí nicaj suun rey cavii rej sj güii ca'na' nij so' a. <sup>13</sup>Gaa ne quene'éen 'unj se vaa curihanj va'nuj nana chi'ii tu'va xcuáá tu'vii do', tu'va xcuu yuvaa do', tu'va sí nata' nana ne do', ne ase vaa riquij vaa va'nuj nij nana chi'ii yo' a. <sup>14</sup>O se nana chree me nij so', ne vaj nij so' 'yaj suun nij so' suun nocoo ne'en nij yuvii, ne dan me se cavii nij so' ca'anj nij so' rej ne nij sí nicaj suun rey uun chij rihaan nu' nij yuvii man rihaan chumii a. Gaa ne cunuu chre' cunudanj nij sí nicaj suun rey, qui'yaj nij nana chree, che'é rej cunú' nij sí nicaj suun rey yo' ga Diose asa' quisj güii ca'ne' Diose cacun' che'é yuvii a. Ne Diose me sí guun nucujaj qui'yaj cunudanj ei.

<sup>15</sup>Ne nihánj me se-nana sí 'nij ra'a man ní' a:

—Dan me se ase vaa 'na' yuve sí ituu ro', danj gaa cuchi' 'unj rihaan soj á. Ne cavii sa' sí ne otoj, ne ni'yaj ranga' nij so', ne tumé sa' nij so' sagan' nij so' yatzj catzii á. Dan me se se gaa canj nij so' cachee nij so', ne se cunó chrej na'aj rihaan nij so' ni'yaj yuvii man nij so' ma' —taj sí 'nij ra'a man ní' ni'yaj so' man nij sí ne tumé cacun' a.

<sup>16</sup>Gaa ne dan me se cunuu chre' nij sí nicaj suun rey yo' rej cu'naj

Armagedón xna'ánj hebreo, qui'yaj va'nuj nij nana chree yo' a. <sup>17</sup>Gaa ne se-mozó Diose mozó chij me se tucuayuu so' se man rque se-co'oo so' rihaan nana a. Gaa ne nucujaj ca'mii sí taj chruun xlá sa' nicun' rá nuví nocoo, cataj so', ne:

—Quisj guun yo' á —taj so' a.

<sup>18</sup>Gaa ne quiraan, ne cariin ndo'o, ne caguáj ndo'o tu'vii, ne cachén uxrá yuún yuvaa, ne nucujaj doj yuún yo' rihaan nu' nij yuún cachén rihaan chumii nihánj asij guun che'e yuvii cayáan yuvii rihaan chumii nihánj a. <sup>19</sup>Dan me se quixra' ta'aj chuman' xij nocoo yo', ne cunuu va'nuj ta'aj chuman' xij yo', ne canee cunudanj yo'ó nij chuman' naj rihaan chumii, qui'yaj yuún a. Dan me se na'nuj rá Diose chuman' nocoo cu'naj Babilonia se vaa rque so' 'o aga' na vinó 'na' sayuun co'q chuman' yo', ne na vinó yo' ro', me se vaa caxrj yuvaa Diose man chuman' yo' a. <sup>20</sup>Gaa ne cunánj cunudanj nij yo'óó naj tanuu rihaan na ya'anj do', cayuu cunudanj nij quij xcaan do', ne ne curuvi' a 'ó nij quij a ma'. <sup>21</sup>Ne caman' ndo'o maan yahij xráá nij yuvii, ne vij chihaa chi' kiló me 'o 'o chraan yu've' yo' cayuu xráá nij yuvii a. Gaa ne guun che'e nij so' ca'mii chi'ii nij so' ni'yaj nij so' man Diose che'é maan yahij go' xráá nij so' qui'yaj Diose a. 'O se sayuun uxrá vaa sayuun quiran' nij so' nanj adonj.

**Nana nihánj taj xna'anj che'é  
chaná niha' rá ga chii a**

**17** Gaa ne dan me se ca'na' yo'ó tuvi' chij nij se-mozó Diose nicaj chij nij co'oo, gaa ne cataj so' rihanj a:

—Cuvá' so' nihánj, ne tiháan 'unj rihaan so' daj gaa sayuun quirán' chana niha' rá ga chii chana taj rihaan que'ee nij na ya'anj ei. <sup>2</sup>Dan me se qui'yaj chi'ii nij síí nicaj suun rey uun hij rihaan chumii ga no', gaa ne ase 'yaj nij síí xno ro', danj qui'yaj nij síí man rihaan chumii, che'é se qui'yaj chi'ii nij so' ga no' chuguanj —taj se-mozó Diose rihanj a.

<sup>3</sup>Gaa ne ca'anj nimán 'unj rej tacaan, qui'yaj uún se-mozó Diose a. Gaa ne dan me se quene'én 'unj 'o chana taj xráa xcuu yuvaa maree, ne nó ndo'o se-chuvii xo' xráa xo', ne nij nana yo' me se inanj nana chi'ii me nij yo', ne vaa hij raa xo', ne táa chi' cúu raa xo' a. <sup>4</sup>Ne chana yo' ro', nuú no' yatzíj tintá ga yatzíj maree, ne nó aga' oró míí do', yahij chuguun tu'vee ndo'o do', rmii raan perlá tu'vee ndo'o do', nó rihaan sagan' no' a. Ne nicaj ra'a no' yo'o aga' tazá aga' oró míí, ne ndaa araa ayanj ma'an inanj nij se chi'ii rque aga' oró yo', ne dan me se inanj se chi'ii qui'yaj ma'an no' me se vaa araa man rque saga' no' a. <sup>5</sup>Ne caan rihaan no' ro', nó se-chuvii no', ne nana yuve me se-chuvii no', ne dan me se chuman' nocoo cu'naj Babilonia cu'naj no', ne nii taran' nij chana niha' rá ga chii me no', ne nii cunudanj nij se chi'ii man rihaan chumii me uún no' a. <sup>6</sup>Gaa ne quene'én 'unj se vaa xno chana yo', che'é se aj co'o ndo'o no' ton man nij síí vaa sa' rihaan Diose do', ton man nij síí nata' se-nana Jesucristó do' a. Ne ca'anj ndo'o raj ni'yaj 'unj man no' a. <sup>7</sup>Gaa ne xná'anj se-mozó Diose manj, cataj so', ne:

—Me che'é ca'anj rá so' ga. 'O se cataj xna'anj 'unj rihaan so' nana yuve nana che'é chana do', che'é xcuu yuvaa ata man no' xcuu taj hij cúu yave do', che'é chi' cúu taj raa hij cúu yave xo' do' a. <sup>8</sup>Xcuu yuvaa ne'én so' ro', me síí cayáan asij rque doj, tzaj ne taj vaj so' rihaan chumii cuano ma'. Ne rej rihaan ní' me se vaa cavii uún so' yu'uj cunuú ndo'o, gaa ne ca'anj so' rej quirí' nu' so' ei. Tananj uún, ne vaa nij síí man rihaan chumii síí ne nó se-chuvii rihaan yanj nó se-chuvii nij síí gaa i'na' nu' cavii nu' ca'anj asij ataa qui'yaj Diose chumii, ne ca'anj rá nij so' ni'yaj nij so' xcuu yuvaa yo', che'é se quene'én nij so' se vaa asij rque doj cayáan xo', ne taj vaj xo' cuano ma'. Ne rej rihaan ní' me se ca'na' uún xo' adonj. <sup>9</sup>Ne nihánj me xcaj síí avii raa cuentá a. Dan me se hij nij raa xcuu yuvaa yo' ro', me hij quij, ne ne chana yo' xráa nij quij yo' a. Ne hij síí nicaj suun rey me uún hij nij raa xcuu yuvaa yo' a. <sup>10</sup>Dan me se 'un' nij so' ro', aj quirí' ne aj navij cachén nij so' suun a. Ne yo'ó so' ro', ne cuano, ne ataa quisij yo'ó so' uún, ne asa' ca'na' yo'ó so', ne doj cayáan so' rihaan suun nanj á. <sup>11</sup>Ne ma'an xcuu yuvaa yo' me se síí cayáan asij rque me so', ne taj vaj so' ne cuano ma'. Ne síí nicaj suun rey tunj me so', tzaj ne yo'ó tuvi' yo'ó hij nij síí nicaj suun rey me uún so', ne cavii so', ne quirí' nu' so' nanj adonj.

<sup>12</sup>Ne chi' nij cúu taj nij raa xcuu yuvaa ro', me chi' nij síí nicaj suun rey uún a. Dan me se ataa cayáan nij so' qui'yaj nij so' suun a. Tzaj ne

asa' qui'yaj nij so' suun rey me se orún' orá nii guun nij so' síí nicaj suun rey ne guun chij nij so' ga ma'an xcuu yuvaa yo' ei. <sup>13</sup>Dan me se yo'o cuyaan gaa rá taran' nij so', ne nayon xcuu yuvaa rihaan nij so' guun chij ma'an xcuu yuvaa, qui'yaj ma'an nij so' adonj. <sup>14</sup>Gaa ne cunú' taran' nij so' ga matzinj le'ej, tzaj ne qui'yaj canaán nij tuví' matzinj le'ej rihaan nij so' ei. 'Q se matzinj le'ej ro', me síí 'nij ra'a man nu' síí uun chij, ne síí nicaj suun rey uun chij rihaan nu' síí nicaj suun rey me uún so' adonj. Ne nij tuví' so' ro', me nij síí canacúún so' canoco' man so', ne dan me se aj narii so' man nij so', ne yo'o amán rá nij so' ni'yaj nij so' man so' ei —taj se-mozó Diose rihanj a.

<sup>15</sup>Gaa ne cataj uún so':

—Nij na quene'én so' rej ne chana niha' rá ga chii ro', me que'ee yuvii do', yuvii man que'ee chuman' do', yuvii a'mii que'ee xna'ánj a'mii yuvii do' a. <sup>16</sup>Ne xcuu yuvaa yo' do', chí' nij cúú taj raá xcuu yuvaa do', nachri' ndo'o nij so' ni'yaj nij so' man chana niha' rá ga chii yo' a. Ne quirí' nu' no', qui'yaj nij so', ne cánj uun gaa no', qui'yaj nij so', ne chá nij so' man no', ne cacaa nu' no', qui'yaj nij so' nanj ei. <sup>17</sup>'Q se ma'an Diose caxríj chrej rque nij so' se vaa qui'yaj nij so' ndaa vaa me rá ma'an so' qui'yaj nij so', ne che'é dan yo'o vaa rá taran' nij so', ne nayón xcuu yuvaa rihaan nij so' guun chij xo', qui'yaj nij so', ne veé danj guun chij ya xo' ndaa se quisij ya nu' se-nana Diose ei. <sup>18</sup>Ne ma'an chana quene'én so' ro', no' me chuman' nocoo 'nij ra'a man nij síí nicaj

suun rey uun chij rihaan chumii a —taj se-mozó Diose rihanj a.

Nana nihánj taj xna'anj se vaa canee nu' chuman' Babilonia a

**18** Veé dan, gaa ne quene'én 'unj yo'ó se-mozó Diose cavii rej xta' nanij rihaan yo'óó, ne síí nucuaj ndo'o me so' a. Ve'é ndo'o curuvi' so', ne chuguun rihaan yo'óó, qui'yaj so' a. <sup>2</sup>Gaa ne nucuaj ndo'o caguáj so', cataj so', ne:

—Canee nu' chuman' nocoo cu'naj Babilonia, ne guun chihanj nana chree man yo', ne taga' nuu nij nana chí'ii do', yachrúú do', me yo' yaj ei. <sup>3</sup>'Q se chuman' yo' me se rque ndo'o no' na vinó co'o cunudanj nij yuvii man rihaan chumii, ne na vinó yo' ro', me sayuun quiran' nij so' che'é cacun' chí'ii qui'yaj nij so' ga no' a. Dan me se qui'yaj ndo'o nij síí nicaj suun rey cacun' ga no', ne nij síí naránj natu'vej ro', guun ru'vee ndo'o nij so' che'é rej ca'néj nu' nij so' nu' se sa' man chuman' yo' nanj adonj —taj se-mozó Diose yo' a.

<sup>4</sup>Gaa ne cunó 'unj nana ca'mii yo'ó so' rej xta', ne dan me se cataj so':

—Curihanj soj sij noco' manj chuman' yo' ei. Se guun qui'yaj soj cacun' ndaa vaa 'yaj nij síí man chuman' yo' mei. Curihanj soj do', se quiran' soj sayuun ndaa vaa quiran' nij so' ei. <sup>5</sup>'Q se aj ne'en Diose se vaa nocoo ndo'o cacun' taj xráá nij so', ne nihánj me se qui'yaj Diose sayuun man nij so' chuguanj. <sup>6</sup>Dan me se ase vaa qui'yaj chuman' yo' sayuun man yuvii ro', danj

gaa qui'yaj guee soj sayuun man chuman' yo', ne vij naru'vee soj sayuun man chuman' yo' ei. Dan me se rque ma'an aga' tazá tinachej chuman' yo' na co'o yuvii ro', veé maan rque aga' tazá yo' ro', vij guun che'e soj caraa soj na co'o ma'an chuman' yo' á. <sup>7</sup>Dan me se ca'mii xta' ndo'o no', ne nano' ndo'o no' se sa' gaa rihaan no', ne che'é dan qui'yaj ndo'o soj sayuun ndaa ca'ngaj ma'an nimán no', qui'yaj soj, ne ndaa que'ee ndaa cúu man no', qui'yaj soj, gaa ne xri' ndo'o rá no' ei. Dan me se taj nimán no': “Ne amán raj daj chihaa mój mei. Ma'anj me chana reiná uun chij ya, ne ne chu'vij ma'. Nuveé chana cavi' nica mej, ne se quirán' 'unj sayuun daj chihaa mój ma'”, taj no' a. <sup>8</sup>Ne che'é dan rque orún' güii me se ca'na' nu' nij sayuun quirán' no', ne dan me se cavi' ndo'o yuvii rque no' do', quinano ndo'o rá nij yuvii do', cachén ndo'o x'naa rque no' do', cacaa nu' no', qui'yaj ya'an do', nanj ei. 'O se nucuaj ndo'o Diose sís 'nij ra'a man soj sís ca'ne' cacun' che'é chuman' yo' nanj chuguanj —taj nana ca'mii sís ca'mii rej xta' a.

<sup>9</sup>Dan me se ta'vee ndo'o nij sís nicaj suun rey uun chij rihaan chumii ni'yaj nij so' man chuman' yo' asa' quene'en nij so' se vaa avii ndo'o catze' rej acaa chuman' yo' a. 'O se nij so' me sís qui'yaj ndo'o cacun' chi'ij ga no', ne cutun' ndo'o nij so' se sa' ga no' a. <sup>10</sup>Ne dan me se gan' canicun' nij so' rej naj chuman' yo', che'é rej cuchu'vi' nij so' quene'en nij so' sayuun quirán' no' a. Ne cataj nij so':

—Ai. Ai. Ná'unj. Ni'qué so' chuman' nocoo chuman' nucuaj chuman' cu'naj Babilonia ei. 'O se rque orún' orá ca'na' sayuun rihaan so' che'é cacun' tumé so' a —cataj nij sís nicaj suun rey yo', ni'yaj nij so' man chuman' Babilonia yo' a.

<sup>11</sup>Ne nij sís naránj natu'vej rihaan chumii ro', ta'vee ndo'o nij so', ne quinano ndo'o rá nij so' ni'yaj nij so' chuman' yo' a. 'O se se ca'vee cane' a doj si'yaj nij so' rasuun, <sup>12</sup>aga' oró mii do', aga' platá catzii do', yahij chuguun tu'vee ndo'o do', rmii raan perlá do', yatzij linó do', yatzij sedá do', yatzij tintá do', yatzij maree do', nu' chruun gun' daj do', nu' rasuun rii nii man cúu marfil do', nu' rasuun rii nii man chruun sa' do', nu' rasuun rii nii man aga' bronce maree do', nu' rasuun rii nii man aga' hierró ndo'o do', nu' rasuun rii nii man yahij mármol do', <sup>13</sup>quíí canelá do', coj gun' daj do', na gun' daj do', squíí cu'naj mirra do', squíí xlá do', na vinó do', casté do', hariná do', 'núu trigó do', scúj do', matzinj do', cuayó do', cuchri' do', ndaa ma'an yuvii guun mozó do', se cane' daj chihaa mój uún rasuun yo', qui'yaj nij so' a ma'. <sup>14</sup>Ne nij sís naránj natu'vej ro', ca'mii nij so' rihaan chuman' yo', cataj nij so', ne: —Ne nij chruj niha' ndo'o rá so' cha so' ro', navij nu' chruj yo', ne nu' se tu'vee ndo'o do', nu' se chuguun do', ca'anj ni'ya nij yo' rihaan so', ne daj chihaa mój se nari uún so' man nij rasuun sa' vaa danj yaj a ma' —cataj nij sís naránj natu'vej rasuun a.

<sup>15</sup>Ne nij so' ro', me nij sís cunuu ru'vee qui'yaj chuman' yo', ne gan'



canicun' nij so' ga no', che'é se  
cuchu'vi' nij so' ni'yaj nij so' sayuun  
quiran' no' a. Dan me se ta'vee nij  
so', ne quinano ndo'o rá nij so', <sup>16</sup>ne  
cataj nij so':

—Ai. Ai. Nique ndo'o so' chuman'  
nocoo nanj á. Chuman' nuu yatzíj  
linó mé so', ne yatzíj tintá do',  
yatzíj marce do', nuú so', ne aga'  
oró míi do', yahij chuguun tu'vee  
ndo'o do', rmii raan perlá do', nó  
rihaan so', <sup>17</sup>tzaj ne rque orún' orá  
navij nu' nij yo' quiri' tananj —cataj  
nij síi naránj natu'vej yo' a.

Ne cunudanj nij síi tuguáj rihoo  
chéé rihaan na ya'anj do', nu' nij síi  
'yaj suun rihaan rihoo chéé rihaan  
na ya'anj do', canicun' nij so' rej  
gan' a. <sup>18</sup>Dan me se gaa quene'en  
nij so' rej avii catze' yan acaa  
chuman', gaa ne caguaj nij so', cataj  
nij so':

—Me rej naj yo'ó chuman' nocoo  
doj rihaan chuman' nihánj, rá soj  
yaj onj —cataj nij so' a.

<sup>19</sup>Dan me se caraa nij so' yo'óó  
tachruu raaj nij so', ne ta'vee ndo'o  
nij so', ne quinano rá nij so', ne  
cataj uún nij so', ne:

—Ai. Ai. Ni qué so' chuman' nocoo  
nanj á. Dan me se guun ru'vee  
taran' núj sij si'yaj rihoo chéé  
rihaan na ya'anj, qui'yaj rasuun  
sa' tu'vee man rqué so' tzaj man.  
Tzaj ne nihánj me se rque orún' orá  
navij nu' so' nanj asuun. <sup>20</sup>Tzaj ne  
guun niha' rá nij soj sij ne rej xta'  
do', sij vaa sa' rihaan Diose do', sij  
ca'née Jesucristó nata' rihaan yuvii  
che'é so' do', sij nata' se-nana Diose  
do', ni'yaj soj chuman' yo' á. 'O se  
qui'yaj Diose sayuun man chuman'  
yo' che'é cacun' qui'yaj chuman'

yo' rihaan soj ei —cataj uún nij síi  
tuguáj rihoo chéé rihaan na a.

<sup>21</sup>Gaa ne yo'ó se-mozó Diose síi  
nucuj ndo'o ro', naxcaj so' yo'ó  
yuvej xij, ne yuvej xij caxra' ndo'o  
me yo', ne quiri'íj so' man yo' rque  
na ya'anj, ne cataj so':

—Veé danj gaa quiran' guee so'  
chuman' nocoo cu'naj Babilonia ei.  
Dan me se quiri'íj nii mán so' rque  
na ya'anj, ne daj chihaa míj se nari'  
uún nii mán so' rque na ya'anj  
a ma'. <sup>22</sup>Ne daj chihaa míj se cuno  
nii chra' rque se-callé so' chuman'  
a ma'. Se cuno nii cachraa ya'anj  
do', cachraa rihuu do', cachraa  
chruun a'yánj do', rqué so' a ma'.  
Ne se gaa síi qui'yaj me ma'an suun  
do', se gaa máquina váj nihaj do', se  
gaa a 'ó rasuun rqué so' a ma'. <sup>23</sup>Ne  
se cuchuguun a 'ó aga' ya'an rej náa  
so' do', se nara'aa yuvii rej náa so'  
do', se cuno nii ca'mii cachraa yuvii  
do', rqué so' a ma'. 'O se nij síi  
naránj natu'vej ne rqué so' ro', me  
se nij síi ru'vee doj rihaan cunudanj  
nij ru'vee man rihaan chumii me nij  
so' adonj. Ne nij rmedió chi'ii cane'  
rqué so' ro', me se tiha' yu'unj yo'  
man cunudanj nij yuvii man rihaan  
chumii chuguanj. <sup>24</sup>Ne ma'an so'  
tumé cacun' se vaa cavi' nij síi nata'  
se-nana Diose cavi' nij síi vaa sa'  
rihaan Diose cavi' cunudanj nij síi  
ticavi' nii rihaan chumii adonj —taj  
se-mozó Diose yo', ca'mii so' rihaan  
chuman' nocoo cu'naj Babilonia a.

**19** Veé dan, gaa ne cunó 'unj  
nana ca'mii nucuj que'ee  
yuvii nicun' rej xta', ne cataj  
nij yuvi:

—Caraa guee ní' rihaan Ya'anj  
ei. Diose síi nocoo ní' man ro',

so' me sí tinanii man ní' rihaan sayuun, ne guun chij ndo'o so', ne sí nucaj ndo'o me so' adonj. <sup>2</sup>'O se nana ya nana nica inanj me nu' nana a'mii so' gaa a'ne' so' cacun' che'é yuvij adonj. 'O se yaj me naru'vee Diose rihaan nij yuvij che'é nu' cacun' qui'yaj nij yuvij rihaan Diose a. Che'é dan qui'yaj so' sayuun man chuman' nocqo chuman' guun chana nihá' rá ga chii, che'é se quirí' nu' chumij, qui'yaj no' do', che'é nu' nij sí nuu rihaan ma'an Diose sí cavi' qui'yaj chuman' nocqo yo' do' a —taj nij yuvij yo' a.

<sup>3</sup>Gaa ne cataj uún nij sí ca'mii rej xta' yo':

—Caraa guee ní' rihaan Ya'anj ei. Ne nu' cavii nu' ca'anj me se yo'o cavii catze' rej acaa chuman' yo' a —taj uún nij so' a.

<sup>4</sup>Gaa ne canicun' ruj ico ca'anj nij sí uun chij do', ca'anj nij xcuu do', rihaan Diose sí taj rihaan chruun xlá sa' yo', ne na'vúj nij so' rihaan so', cataj nij so':

—Veé danj gaa ya ei. Caraa guee ní' rihaan Ya'anj ei —taj nij so' a.

**Nana nihánj taj xna'anj che'é cha'anj nara'aa matzinj le'ej yo' a**

<sup>5</sup>Gaa ne cunó 'unj doj nana cavii rej nicun' chruun xlá sa', ne cataj nana yo':

—Ca'mii sa' inanj soj rihaan Diose sí noco' ní' man á. Dan me se soj sij 'yaj suun rihaan so' sij aráj cochroj rihaan so' ro', ta'aj soj me sí nique, ne ta'aj soj me sí sa' ata suun, ne ca'mii sa' taran' soj che'é so' á —taj nana cavii rej nicun' chruun xlá sa' yo' a.

<sup>6</sup>Gaa ne cunó 'unj doj nana ca'mii que'ee ndo'o yuvij, ne ase uun rá' unó' cayuj vaj chráá xij do', ase uun rá' unó' aguáj ndo'o tu'vii do', danj guun raj gaa cunoj se-nana nij so', ne cataj nij so':

—Caraa guee ní' rihaan Ya'anj ei. 'O se guun che'e Diose sí 'nij ra'a man ní' guun chij so' ei. Sí uun nucaj qui'yaj cunudanj me so' adonj. <sup>7</sup>Dan me se guun nihá' uxrá rá ní', ne ca'mii sa' ní' che'é so' á. 'O se nihánj me se anuú cha'anj nara'aa matzinj le'ej, ne chana xcaj so' man ro', aj quisj qui'yaj chuvij no' man no' nara'aa no' ga so' ei. <sup>8</sup>Ne rque nii yatzj linó sa' inanj cunuú no', ne ndaa too chuguun ma'an yatzj yo', ne naruvii sa' ndo'o yatzj yo' a. Ne yatzj yo' ro', me nu' se sa' qui'yaj nij sí vaa sa' rihaan Diose adonj —cataj nij yuvij yo' a.

<sup>9</sup>Gaa ne cataj yo'o so' rihanj a:

—Cachron so' nana nihánj rihaan yanj á. Dan me se vaa che'é gaa nihá' rá nij sí canacúún nii man cha xti'no cha'anj nara'aa matzinj le'ej yo', cachron so' á —taj so' rihanj, ne cataj uún so'— Nana nihánj me nana ya ca'mii ma'an Diose adonj —taj uún so' a.

<sup>10</sup>Gaa ne canicun' ruj 'unj rihaan so' quina'vij 'unj rihaan so' a. Tzaj ne cataj uún so' rihanj a:

—Se qui'yáá so' danj ma'. 'O se 'unj ro', me sí 'yaj suun ga nij tinuj nij soj sij nata' se-nana Jesucristó rihaan yuvij a. Rihaan orún' Diose na'vij so' ei. 'O se nu' nana ca'mii nij sí nata' se-nana Diose ro', me nana rque Nimán Diose rihaan nij so', ne se-nana Jesucristó me nana yo' adonj —taj so' rihanj a.

**Nana nihánj taj xna'anj che'é  
sís taj xráa cuayó catzii a**

<sup>11</sup>Gaa ne quene'én 'unj se vaa naxra' rej xta', gaa ne cavii 'o cuayó catzii, ne sís taj xráa cuayó yo' ro', me sís cu'naj sís sa' a'mii nana ya a. Ne sís nō xcúún atā suun cu'naj uún so', ne a'ne' nica so' cacun' che'é yuvi, ne sa' uxrá unu' so' a. <sup>12</sup>Ne ase vaa ya'an chuguun vaa rij rihaan so', ne que'ee ndo'o cachriin nuú raá so' a. Ne nó se-chuvii so' xráa so', tzaj ne dan me se orún' so' me sís ne'en daj cu'naj so' a. <sup>13</sup>Ne nuu so' yatzij quixij ndo'o ton man, ne tucu'náj nii se-nana Diose man so' a. <sup>14</sup>Ne canoco' nij tanuu man rej xta' xcó so', ne táa nij so' xráa cuayó catzii, ne nuu taran' nij so' yatzij linó sa' catzii naruvii sa' a. <sup>15</sup>Ne 'nij tu'va so' neê espadá sihaa, ne yo' me se vaa go' so' xráa nij yuvi man rihaan chumii, ne nicaj so' vará aga' hierró, ne tumé ma'an so' man nij yuvi a. Ne ma'an so' me sís ca'ne' cacun' che'é yuvi, ne quirii so' nu' cacun' atā yuvi, ne nda' rá se vaa ru'maan che'é nii chruj uvá ne rii nii nu' na uvá ro', veé danj gaa guee qui'yaj so', ne cavii nu' cacun' atā yuvi, qui'yaj so' a. Dan me se racuíj so' man Diose sís uun nucuaj qui'yaj cunudanj axrij yuvaa Diose man nij sís tumé cacun' a. <sup>16</sup>Ne rihaan sagan' so' ne rihaan ta'maan so' do', nó se-chuvii so', ne sís 'nij ra'a man nu' nij sís uun chij, ne sís nicaj suun rey uun chij rihaan nu' nij sís nicaj suun rey me se-chuvii so' a.

<sup>17</sup>Gaa ne quene'én 'unj se vaa nicun' 'o se-mozó Diose tanuu

rihaan güii, ne nucuaj ndo'o caguáj so' rihaan cunudanj nij xtaa do', rihaan cunudanj yachrúu do', cataj so', ne:

—Ca'na' cunudanj soj cunu chre' soj, ne qui'yaj chuvii Diose cha xti'no soj ei. <sup>18</sup>Ne dan me se nee man sís nicaj suun rey do', nee man tanuu uun chij doj do', nee man sís nucuaj do', nee man cuayó do', nee man nij sís taj xráa cuayó do', nee man mozó do', nee man sís ne uun mozó do', nee man sís nique do', nee man sís sa' atā suun do', cha soj á —cataj se-mozó Diose rihaan nij xo' a.

<sup>19</sup>Gaa ne quene'én 'unj man xcuu yuvaa yo' ga nij sís nicaj suun rey uun chij rihaan chumii ga nij tanuu nuu rihaan nij so', ne dan me se aj nuu chre' nij so' cunu' nij so' ga sís taj xráa cuayó catzii do', ga nij tanuu nuu rihaan so' do' a. <sup>20</sup>Tzaj ne quita'aa nii man xcuu yuvaa yo' do', man sís nata' nana ne sís qui'yaj suun nocoo rihaan xcuu yuvaa do' a. Ne suun nocoo qui'yaj so' me se veé danj tiha' yu'unj ndo'o so' man nij sís ca'ne' rá quino se-ta'nga' xcuu yuvaa yo' man do', sís quina'víj rihaan se-tinanga' xcuu yuvaa che'é suun nocoo quene'en nij so' do' a. Gaa ne dan me se quirii'íj nii man roj so' rque na ya'anj rej acaa ndo'o yo'óo azufré, ne veé danj vaa i'na' roj so' quirii'íj nii man roj so' rihaan na ya'anj yo' a. <sup>21</sup>Gaa ne neê espadá nuu tu'va sís taj xráa cuayó catzii yo' ro', me se cavi' yo'óo nij sís nocoo' xcó roj so', qui'yaj neê espadá yo' a. Dan me se chá nij xtaa do', chá nij yachrúu do', man nee man nij sís cavi' yo' ndaa daj quisij caraa ma'an rque nij xo' a.

Nana nihánj taj xna'anj che'é  
míj nij yo' numíi xcuáá tu'vii a

**20** Gaa ne quene'én 'unj yo'o se-mozó Diose cavii rej xta', ne nanij so' 'na' so', ne oro' so' aga' ne' ga raga' yavé 'nij tu'va yu'uj cunuu rmi' ndo'o yo' a. <sup>2</sup>Gaa ne quita'aa so' xcuáá tu'vii xcuáá cayáán gaa naá a. Ne xcuáá tu'vii yo' ro', me síi chree, ne Satanás cu'naj so' a. Gaa ne dan me se nicaj se-mozó Diose aga' ne' numíj se-mozó Diose man so' rque 'o míj ya yo' a. <sup>3</sup>Gaa ne quiri'íj se-mozó Diose man so' rque yu'uj cunuu rmi' ndo'o, ne caxríj so' raga', ne cachrón so' 'o ta'nga' selló ya tu'va yu'uj cunuu rmi' ndo'o yo', che'é rej yo'o qui'nij yuve xcuáá yo', gaa ne se gaa nanj tihá' yu'unj uún xcuáá tu'vii yo' doj man nij yuvii man rihaan chumii rque 'o míj ya yo' a. Dan me se gaa quisij míj nij yo' yo', gaa ne nache uún xcuáá tu'vii yo' doj tzin' a.

<sup>4</sup>Gaa ne dan me se quene'én 'unj chruun xlá sa', ne vaa nij síi taj nij chruun xlá sa' yo' a. Dan me se ca'ne' Diose suun rihaan nij so' se vaa ca'ne' nij so' cacun' che'é nij yuvii a. Ne quene'én 'unj man yo'ó nij síi ne rej yo' a. Ne nij so' ro', me nij síi sa' cavi' che'é se-nana Jesucristó nana nata' nij so' do', che'é se-nana Diose do' a. Ne nij so' ro', ne na'vij nij so' rihaan xcuu yuvaa do', rihaan se-tinanga' xcuu yuvaa do' ma'. Ne ne ca'vej rá nij so' cata' se-ta'nga' xcuu yuvaa yo' caan rihaan nij so' do', ra'a nij so' do' ma'. 'O se cunuu i'na' uún nij so', ne 'o míj yo' cayáán nij so' ne

guun chij nij so' ga Jesucristó a. <sup>5</sup>Ne xa' yo'ó nij síi cavi', tzaj ne ne cunuu i'na' uún nij so' ndaa se quisij ya nu' míj yo' yo' a. Tzaj ne nij síi taj rihaan chruun xlá sa' yo' ro', nij so' me nij síi cunuu i'na' uún asino yaan rihaan cunudanj nij yuvii a. <sup>6</sup>Dan me se síi vaa sa' inanj me se síi cavii sa' ndo'o me nij so', che'é se síi cunuu i'na' uún asino yaan me nij so' ei. Se ca'vee daj chihaa míj cavi' uún nij so' a ma'. Tzaj ne guun nij so' xrej cayáán rihaan Diose do', rihaan Jesucristó do', ne guun chij nij so' ga Jesucristó nu' míj ya yo' yo' ei.

<sup>7</sup>Gaa ne asa' quisij míj nij yo', gaa ne curihanj uún síi cu'naj Satanás taga' nuu so', <sup>8</sup>gaa ne cavii so' tihá' yu'unj so' man nij síi man rihaan nu' cachra' chumii adonj. Dan me se tihá' yu'unj so' man nij síi ne chuman' Gog do', man nij síi ne chuman' Magog do', gaa ne cunuu chre' taran' nij so', qui'yaj so', che'é rej cunú' nij so' a. Ne ase vaa que'ee ndo'o nij yo'óo chruu naj tu'va na ya'anj ro', danj gaa que'ee nij tuvi' nij so' nanj ei. <sup>9</sup>Dan me se cavii nij so' rihaan taa, ne tucuachriin nij so' man rej ne nij tanuu sa' nij síi vaa sa' rihaan Diose do', man ma'an chuman' 'ee rá Diose man do' a. Gaa ne maan orá yo' cavii ndo'o ya'an rej xta' nanij yo' rihaan yo'óo, gaa ne cacaa nu' nij síi chi'ii yo', qui'yaj ya'an yo' nanj adonj. <sup>10</sup>Gaa ne dan me se síi chree síi tihá' yu'unj man nij so' ro', quiri'íj nii man so' rque na ya'anj rej acaando'o yo'óo azufre', ne yo' me rej nuu xcuu yuvaa do', síi nata' nana ne do' a. Gaa ne dan me se nuvii

nigan' quiran' ndo'o nij so' sayuun nu' cavii nu' ca'anj nanj adonj.

**Nana nihánj taj xna'anj che'é chruun xlá xij catzii rej ca'ne' Diose cacun' che'é yuvii a**

<sup>11</sup>Gaa ne dan me se quene'én 'unj 'o chruun xlá xij catzii, ne quene'én 'unj 'o síi taj chruun xlá yo', ne cucu'vi' ndo'o nu' chumii do', nu' rej xta' do', ni'yaj roj yo' man so' a. Dan me se naxuun roj yo' man roj yo' rihaan síi taj chruun xlá, ne 'o se ne nari' roj yo' rej quinaj roj yo' a ma'. <sup>12</sup>Gaa ne quene'én 'unj man nij síi cavi' uún a. Dan me se síi sa' ata suun do', síi nique do', síi nocoo do', síi cunii do', quene'én 'unj, ne nicun' nij so' rihaan síi taj chruun xlá xij catzii yo' a. Gaa ne nuxra' nii nij yanj libró a. Dan me se nuxra' nij so' man yo'ó yanj libró no se-chuvii nij síi gaa i'na' nu' cavii nu' ca'anj ga Diose a. Dan me se ca'ne' Diose cacun' che'é nij síi cavi' yo', ne ni'yaj so' nana no rihaan nij yanj libró yo' nana taj xna'anj ndaa vaa qui'yaj nij so' gaa vaa i'na' nij so' rihaan chumii a. <sup>13</sup>Dan me se narqué na ya'anj nu' nij síi cavi' rque na ya'anj, ne me rej ma'an naj nij síi cavi' yo' nurihanj nij so' canicun' nij so' rihaan síi taj chruun xlá xij catzii yo' a. Dan me se ni'yaj Diose rihaan yanj libró, ne ca'ne' Diose cacun' che'é 'o 'o nij so' ndaa vaa qui'yaj 'o 'o nij so' a. <sup>14</sup>Dan me se ma'an ta'naj 'yaj avi' yuvii do', nu' rej naj nimán nij síi cavi' do', quiri'fj Diose man nij yo' rihaan ya'an cacaa nij yo' a. Ne rihaan ya'an yo' ro', me rej yo'ó cavii ya' uún nii nu' cavii nu'

ca'anj a. <sup>15</sup>Ne xa' taran' nij síi nuvi' se-chuvii rihaan yanj no se-chuvii nij síi gaa i'na' nu' cavii nu' ca'anj, tzaj ne quiri'fj nii man nij so' rihaan ya'an, ne yo'ó cacaa nij so' ei.

**Nana nihánj taj xna'anj che'é rej xta' naca do', che'é yo'ó naca do' a**

**21** Dan me se cachén nu' rasuun nga, gaa ne quene'én 'unj rej xta' naca do', yo'ó naca do' a. 'O se aj navij nu' rej xta' nga do', yo'ó nga do', ne na ya'anj me se nuvi' yo' naj a ma'. <sup>21</sup>O se 'unj sij cu'naj Juan me quene'en se vaa cavii chuman' guee chuman' Jerusalén naca rej xta' rej ne Diose, ne nanij yo', ne ase uun rá' ni'ya' chana nara'aa ro', danj guun raj ni'yaj 'unj man chuman' yo' a. <sup>3</sup>Gaa ne dan me se cunó 'unj nana ca'mii síi taj chruun xlá sa', cataj so', ne: —Ni'yaj soj ei. Nihánj me rej cayáan Diose ga yuvii a. Dan me se cayáan so' ga nij yuvii, ne taj ya'anj so' man nij yuvii, ne dan me se cayáan rcua'aan Diose ga nij so', ne Diose síi nocoo' nij so' man me so' nanj adonj. <sup>4</sup>Ne ma'an Diose ro', na've nu' na ayanj rihaan nij so', ne se cavi' uún nij so' a ma'. Ne se nanó rá' nij so' do', se ta'vee nij so' a doj do', se quiran' nij so' a doj sayuun do', a ma'. 'O se aj cachén nu' rasuun nga yo' nanj adonj —taj síi taj rihaan chruun xlá sa' yo' a.

<sup>5</sup>Gaa ne cataj uún so':

—Ni'yaj soj ei. Nihánj me se qui'yaj naca uún 'unj man cunudanj nij rasuun nanj ei —taj so', gaa ne cataj uún so'— Cachron so' nana nihánj rihaan yanj á. 'O se nana ya me nana nihánj, ne vaa che'é gaa

nucuaꝝ rá soꝝ manꝝ se vaa qui'yáꝝ nu' rasuun nihánꝝ ei —taj so' a. <sup>6</sup>Gaa ne cataꝝ uún so' rihanꝝ— Aj quisíꝝ qui'yáá 'unꝝ nu' rasuun nanꝝ á. Ne ase vaa letrá A do', ase vaa letrá Z do', vaa 'unꝝ, ne dan me se sij nicun' asij rque mej, ne veé 'unꝝ canicun' nu' cavii nu' ca'anꝝ nanꝝ adonꝝ. Ne rihaan síꝝ nacoꝝ na me se rque 'unꝝ na co'ꝝ so', ne gaa i'na' so' nu' cavii nu' ca'anꝝ, qui'yaj na yo' ei. Ne dan me se co'ꝝ uun so' na, ne se ca'néꝝ 'unꝝ a doꝝ sa'anꝝ man so' a ma'. <sup>7</sup>Ne síꝝ 'yaj canaán ro', me se guun so' síꝝ nicaj cunudaꝝ rasuun si'yáá 'unꝝ, ne 'unꝝ ro', me se guun Diose taj ya'anꝝ man nij so', ne nij so' ro', guun ta'níꝝ ne'ej adonꝝ. <sup>8</sup>Tzaj ne xa' nij síꝝ cunánꝝ rihaan sayuun do', nij síꝝ ne noco' raan manꝝ do', nij síꝝ 'yaj se chi'ii do', nij síꝝ ticavi' tuvi' do', nij síꝝ 'yaj chi'ii ga chana do', nij síꝝ chruun do', nij síꝝ na'víꝝ rihaan ya'anꝝ acóꝝ yuviꝝ do', taran' nij síꝝ ne do', me se vaa rej cacaa nij so' rihaan ya'an, ne rej acaa ndo'ꝝ yo'óꝝ azufre me yo' ei. Yo' me rej cavi' uún nij so' nu' cavii nu' ca'anꝝ nanꝝ chuguꝝanj —taj síꝝ taj rihaan chruun xlá sa' yo' a.

**Nana nihánꝝ taj xna'anꝝ che'é chuman' Jerusalén naca a**

<sup>9</sup>Gaa ne ca'na' yo'ꝝ tuvi' chij nij se-mozó Diose síꝝ nicaj chij nij co'oo araa ndaa ayanꝝ ma'an chij nij sayuun a. Gaa ne cataꝝ so' rihanꝝ a: —Cuva' so' nihánꝝ, ne tihaán 'unꝝ chana xcaꝝ matzinꝝ le'ej man rihaan so' á —taj so' rihanꝝ a.

<sup>10</sup>Gaa ne dan me se ca'anꝝ nicaj so' nimanꝝ raꝝ quix xcaꝝn, gaa ne tihaan so' chuman' guꝝe cu'naj

Jerusalén rihanꝝ, ne cavii chuman' yo' rej xta' rej ne Diose, ne nanij yo' rihaan yo'óꝝ a. <sup>11</sup>Ne chuman' yo' ro', me se ma'an ta'an Diose me 'yaj chuguun cunudaꝝ chuman' yo' nanꝝ adonꝝ. Ne chuguun yo' ndaa vaa chuguun yahij chuguun tu'veꝝ ndo'ꝝ a. Dan me se ase vaa yahij jaspe vaa yo', chuguun ndo'ꝝ yo' a. <sup>12</sup>Dan me se nicun' 'o chingá chraan xij xcaꝝn nu' anicaj tu'va chuman' yo', ne taj chuvij ta'yaa tu'va chingá yo', ne nicun' se-mozó Diose tu'va 'o 'o ta'yaa yo' a. Ne nó se-chuvii chuvij nij x'ne' nij yuviꝝ israelitá rihaan chuvij nij ta'yaa yo' a. <sup>13</sup>Dan me se rej sij güii rihaan chingá chraan ro', táá va'núꝝ nij ta'yaa, ne rej norte rihaan chingá ro', táá ya'núꝝ nij ta'yaa, ne rej sur rihaan chingá chraan ro', táá ya'núꝝ nij ta'yaa, ne rej ata' güii rihaan chingá chraan ro', táá ya'núꝝ nij ta'yaa yo' a. <sup>14</sup>Ne vaa chuvij yuveꝝ xij naj tacóꝝ che'é chingá chraan yo', ne rihaan chuvij nij yuveꝝ yo' ro', nó se-chuvii chuvij nij apóstol cune' matzinꝝ le'ej man nata' se-nana so' rihaan yuviꝝ a.

<sup>15</sup>Ne se-mozó Diose síꝝ ca'mii ga 'unꝝ ro', nicaj so' 'o vará aga' oró míꝝ, che'é rej xcaꝝ ta'nga' so' chuman' do', nij ta'yaa do', nu' chingá do' a.

<sup>16</sup>Ne dan me se cuyaꝝn vaa rej xcaꝝn ga rej caxra' man chuman' yo' a. Gaa ne xcaꝝ ta'nga' so' chuman' yo', ne víꝝ míꝝ táá yavíꝝ cientó kilómetro vaa chuman' yo' rej xcaꝝn do', rej caxra' do', rej xta' uún do' a. Dan me se cuyaꝝn vaa rej xcaꝝn do', rej caxra' do', rej xta' do', man chuman' yo' a. <sup>17</sup>Gaa ne dan me se xcaꝝ ta'nga' so' rej

xcaan xta' chingá yo', ne va'nuj chihaa ca'anj metró taj doj vaa chraan chingá yo' xta' a. Dan me se ase vaa xcaj ta'nga' yuvii rasuun ro', danj vaa xcaj ta'nga' se-mozó Diose yo' nu' chingá yo' a. <sup>18</sup>Ne inanj yahij jaspe me nu' chraan yo', ne inanj aga' oró mii sa' me nu' chuman' yo', ne ase vaa vidrió ro', danj vaa nu' aga' oró mii sa' yo' a. <sup>19</sup>Ne canó me a' yahij chuguun tu'vee ndo'o ro', nó rihaan tacóo chuman' yo' a. Dan me se yo'o yuvej xij naj tacóo chraan ro', me yahij jaspe, ne yo'ó yuvej ro', me yahij zafiro, ne yo'ó yuvej ro', me yahij ágata, ne yo'ó yuvej ro', me yahij esmeralda a. <sup>20</sup>Ne yo'ó yuvej ro' me yahij ónice, ne yo'ó yuvej ro', me yahij cornalina, ne yo'ó yuvej ro', me yahij crisólito, ne yo'ó yuvej ro', me yahij berilo, ne yo'ó yuvej ro', me yahij topacio, ne yo'ó yuvej ro', me yahij crisopraso, ne yo'ó yuvej ro', me yahij jacinto, ne yo'ó yuvej ro', me yahij amatista a. Ne nu' nij yahij yo' ro', nó rihaan 'o 'o nij yuvej xij naj tacóo chingá chuman' yo' a. <sup>21</sup>Ne chuvij nij ta'yaa taj rej atúj yuvii rque chuman' ro', me rmii perlá nanj a. Dan me se orún' rmii perlá yo' me 'o 'o nij ta'yaa a. Ne inanj aga' oró mii sa' me nu' nij callé taj rque chuman' yo', ne ase vaa raan vidrió ro', vaa nu' aga' oró mii yo' a.

<sup>22</sup>Ne nuvi' nuvií nocoo quene'én 'unj rque chuman' yo' ma'. 'O se ma'an Diose síi 'nij ra'a man ní' síi uun nucuaj quiyaj cunudanj ga ma'an matzinj le'ej me roj síi guun nuvií rque chuman' yo' nanj adonj. <sup>23</sup>Ne ne achiin güii do', yavii do',

chuguun rihaan chuman' yo' a ma'. 'O se ma'an Diose chuguun rihaan chuman' yo', ne ma'an matzinj le'ej yo' guun aga' chuguun rque nu' chuman' yo' nanj chuguanj. <sup>24</sup>Ne cunudanj nij yuvii man rihaan chumii, curuvi' ni'yaj nij so' cachee nij so', quiyaj ma'an chuman' yo' a. Ne nij síi nicaj suun rey ro', me se nicaj nij so' nu' si'yaj nij so' rasuun sa', 'na' nij so' rque chuman' yo' a. <sup>25</sup>'O se inanj rej ranga' gaa yo', ne daj chihaa mii se caráan nii ta'yaa taj tu'va chuman' yo' ma'. 'O se taj vaj rej nii chuman' yo' ma'. <sup>26</sup>Ne nu' rasuun sa' nicaj cunudanj nij yuvii man rihaan chumii me se ca'anj nicaj nii nu' rasuun sa' yo' rque chuman' yo' a. <sup>27</sup>Tzaj ne taj vaj a doj se chi'ii catuu rque chuman' yo' ma'. 'O se síi 'yaj se chi'ii do', síi a'mii ne do', se catúj nij so' daj chihaa mii rque chuman' yo' a man adonj. Tzaj ne orún' nij síi no se-chuvii rihaan danj matzinj le'ej yanj libró no se-chuvii nij síi gaa i'na' ga Diose nu' cavii nu' ca'anj ro', orún' nij so' me nij síi catuu rque chuman' yo' nanj adonj.

**22** Gaa ne tihaan se-mozó Diose yo' 'o chráa rihanj, ne chráa nuu na 'yaj vaa i'na' yuvii ga Diose nu' cavii nu' ca'anj me chráa yo' a. Ne ndaa chuguun raan ma'an chráa yo' a. Ne chráa yo' ro', me avii tacóo chruun xlá sa' xrúun Diose do', xrúun matzinj le'ej do' a. <sup>2</sup>Ne tanuu callé nocoo taj rque chuman' yo' nicun' chruun 'yaj vaa i'na' yuvii ga Diose nu' cavii nu' ca'anj a. Dan me se nu' niha tu'va chráa yo' nicun' chruun yo' a. Ne vaa chuvij chruj rii chruun yo', ne



dan me se ino vaa chruj rii chruun yo' 'o 'o yavii, ne dan me se cunu' yo' man chruj ra' chruun yo' a. Ne coj man ra'a chruun yo' ro', 'yaj nahuun sa' cunudanj nij yuvii man rihaan chumii a. <sup>3</sup>Ne taj vaj a doj rasuun chree man yo' a ma'. Ne chruun xla sa' xruun Diose do', xruun matzinj le'ej do', nicun' chuman' yo', ne yo' me rej man nij sif 'yaj suun rihaan so' a. <sup>4</sup>Ne rihaan ya quene'en nij so' rihaan ma'an ya Diose, ne quino se-chuvii Diose caan rihaan nij so', <sup>5</sup>ne taj vaj rej nij quene'en nij so' rej yo' a ma'. Ne se cachiin aga' chuguun do', naan guii do', rihaan nij so' a ma'. 'O se ma'an Diose sif 'nij ra'a man ni' chuguun rihaan nij so', ne dan me se guun chij nij so' nu' cavii nu' ca'anj ga Diose nanj chuguanj.

**Nana nihanj taj xna'anj se vaa nichrun' ca'na' uun Jesucristo a**

<sup>6</sup>Gaa ne cataj uun se-mozó Diose yo' rihanj a:

—Vaa che'é gaa nucuaj ra so' man nana ya nihanj ei. Ne Diose sif 'nij ra'a man ni' sif uun chij nimán nij sif nata' se-nana so' ro', ca'neé so' man se-mozó so' rihaan nij sif 'yaj suun rihaan so', che'é rej tihaan se-mozó so' rihaan nij so' rasuun nichrun' guun adonj —taj se-mozó Diose yo' rihanj a.

<sup>7</sup>Dan me se:

—Nichrun' cuchij rihaan soj ei —taj Jesucristo rihaan ni' a.

Dan me se cavii sa' sif uno nu' nana no rihaan yanj nihanj nana taj xna'anj daj guun rej rihaan ni' a.

<sup>8</sup>'Unj sij cu'naj Juan ro', me sif cuno nu' nana nihanj, ne 'unj me

sif quene'en nu' rasuun nihanj a.

Dan me se gaa quisij cunó 'unj do', quene'en 'unj do', gaa ne canicun' ruj 'unj na'vij 'unj rihaan se-mozó Diose sif tihaan nu' rasuun nihanj rihanj a. <sup>9</sup>Tzaj ne cataj so' rihanj a:

—Se qui'yaa so' danj ma'. 'O se sif 'yaj suun rihaan Diose ga so' do', ga taran' nij tinuu so' nij sif nata' se-nana Diose sif 'yaj nu' nana no rihaan yanj nihanj do', mej nanj adonj. Rihaan orun' Diose na'vij so' á —taj so' rihanj a. <sup>10</sup>'O se cataj uun so'— Se caraan yuve so' se-nana Diose nana taj xna'anj daj guun rej rihaan ni' nu' nana no rihaan yanj nihanj ma'. 'O se nichrun' quisij guii guun nu' nij rasuun nihanj nanj adonj. <sup>11</sup>Che'é dan nij sif 'yaj cacun' ro', yo'o qui'yaj nij so' cacun', ne sif chi'ii nimán ro', yo'o gaa chi'ii nimán so' á. Ne sif vaa nica nimán, tzaj ne yo'o naquiyaj sa' so' nimán so', ne sif vaa sa' rihaan Diose ro', yo'o gaa sa' so' rihaan Diose á —taj se-mozó Diose yo' a.

<sup>12</sup>Dan me se Jesucristo taj:

—Nichrun' cuchij rihaan soj ei. Ne nicaj 'unj se naru'vee 'unj rihaan soj chuguanj. Dan me se naru'vej rihaan 'o 'o soj ndaa vaa rasuun qui'yaj 'o 'o soj adonj. <sup>13</sup>Dan me se ase vaa letra A do', ase vaa letra Z do', vaa 'unj a. Dan me se 'unj ro', me sif taj yaan rihaan cunudanj, ne veé 'unj me sif noco' xcó cunudanj a. Ne veé 'unj me sif nicun' asij gaa guun chumii, ne veé 'unj ro', me sif canicun' nu' cavii nu' ca'anj a.

<sup>14</sup>”Cavii sa' uxrá nij sif na'nu' sagan' ne navij cacun' ata so' a. 'O se cuno xcúun nij so' cha nij so'

chruj man raá chruun 'yaj gaa i'na' yuvií ga Diose nu' cavii nu' ca'anj, ne catuu nij so' ta'yaa taj tu'va chuman' yo' a. <sup>15</sup>Tzaj ne xa' nij sí 'yaj ndaa vaa 'yaj chuvee, tzaj ne xe' ro', quinaj nij so' do', nij sí chruun do', nij sí 'yaj se chi'ii ga chana do', nij sí ticavi' man tuvi' do', nij sí na'v'j rihaan ya'anj cacóy yuvií do', nij sí niha' rá ca'mii nana ne do' a.

<sup>16</sup>"O se 'unj Jesucristó ro', me se ca'née 'unj se-mozó 'unj cuchí' so' rihaan nij soj nata' so' nana nihánj rihaan soj, che'é rej ca'anj soj cataj xna'anj soj nana nihánj rihaan cunudanj nij sí amán rá ni'yaj manj ne 'o 'o chuman' adonj. 'Unj ro', me ta'níí ta'nij si'no síí cu'naj David, ne noco' xna'anj tuvi' so' gaj ei. Ne ase vaa yati' xta'ngaa avii nichrun' rá ranga' ro', vaa 'unj rihaan chumii adonj —taj Jesucristó a.

<sup>17</sup>Ne dan me se Nimán Diose do', chana guun nica Jesucristó do', taj roj so': "Cuvá' so' ei", taj roj so' a. Ne síí uno nana nihánj ro', cataj so': "Cuvá' so' á", cataj so' rihaan tuvi' so' a.

Ne síí nacoó na ro', ca'na' so', ne co'ó so' na 'yaj vaa i'na' yuvií ga Diose nu' cavii nu' ca'anj, sese me rá so' a. Se naru'vee so' a 'ó cha'aa

che'é na yo' ma'. 'O se co'ó uun so' na yo' nanj adonj.

<sup>18</sup>Dan me se 'unj ro', me síí nata' nu' nana no rihaan yanj nihánj rihaan nij soj, ne nana taj xna'anj daj guun rej rihaan ní' me nana nihánj chuguanj. Ne sese nuta' yo'ó so' doj yo'ó nana uún rihaan yanj nihánj, ne quiran' so' nu' sayuun taj xna'anj yanj nihánj, qui'yaj Diose adonj. <sup>19</sup>Ne sese tirí' yo'ó so' ta'aj nij nana no rihaan yanj nihánj nana taj xna'anj daj guun rej rihaan ní', gaa ne daj chihaa m'j se chá so' chruj man raá chruun 'yaj gaa i'na' yuvií ga Diose nu' cavii nu' ca'anj ndaa vaa taj xna'anj yanj nihánj, qui'yaj Diose ma'. Ne se cayáan so' chuman' guee, ndaa vaa taj xna'anj yanj nihánj, qui'yaj Diose ma'.

<sup>20</sup>Dan me se Jesucristó síí nata' ya nana nihánj me se taj so', ne: —Ra'yanj cuchij rihaan soj ei —taj so' rihaan ní' a.

“Veé danj gaa ya ei. Cuvá' so' Jesucristó, cuvá' so' sij 'nij ra'a man núj á”, taj ní' rihaan Jesucristó adonj.

<sup>21</sup>Dan me se me rá 'unj qui'yaj ndo'o Jesucristó sij 'nij ra'a man ní' se luj che'é nij soj nanj ei. Veé danj gaa ya ei.